

ইন্দুমতী

(কাব্য ।

শ্রীরসিকচন্দ্র রায় মহাশয় সাহিত্যার্ণব
প্রণীত ।

ঢাকা
৫৯নং নারিন্দা হইতে
গ্রন্থকার কর্তৃক
প্রকাশিত ।

মূল্য ১/ এক টাকা মাত্র ।

Printed by S. A. Gunny.

At the Alexandra Steam Machine Press Dacca.

উৎসর্গ ।

বিক্রমপুর-তারপাশা-মহাশয়-বংশের

শেষ-কীর্তিমান-বংশ-ধর

সঙ্গীত-সাহিত্য-শিল্প প্রভৃতি কলানুরাগী

পুণ্য-চরিত-আদর্শ-মহাত্মা

স্বর্গীয় রামচন্দ্র রায় মহাশয়-

পিতৃ দেবের—

পবিত্র চরণোদ্দেশে এই ক্ষুদ্র

ইন্দুমতী-কাব্য-কুসুম

ভক্তি-পুষ্পাঞ্জলি—

স্বরূপ

উৎসর্গী-কৃত হইল ।

i

.

“বিক্রমপুরের-ইতিহাস” প্রণেতা ও “বিক্রমপুর” মাসিক
পত্রিকার সম্পাদক সুপ্রসিদ্ধ ঐতিহাসিক
শ্রীযুক্ত যোগেন্দ্রনাথ গুপ্ত লিখিত—

ভূমিকা

কাব্য পৃথিবীর সাহিত্যের শ্রেষ্ঠ সম্পদ। কাব্য হইতেই কবির পরিচয় পাওয়া যায়। সাহিত্যের ধারা যুগে যুগে পরিবর্তিত হইতে দেখা যায়, বর্তমান যুগেও সে লক্ষণ দেখা যাইতেছে—এখনকার দিনে কন্ঠে বাস্তব নরনারী কাব্য ছাড়িয়া থগু কবিতার প্রতিই অধিক অনুরাগী, কাজেই মধুসূদন, হেমচন্দ্র ও নবীনচন্দ্রের চিরমধুময় কাব্য অপেক্ষা লোকে থগু কবিতা পাঠেই অধিকতর আনন্দ অনুভব করেন। এযুগ রবীন্দ্রীয় যুগ। এযুগে থগু কবিতার অথগু রাজত্ব, এহেন দিনে যাঁহারা কাব্য রচনা করিয়া সাহিত্য-জননীর চরণ-শতদলে ভক্তি-পুষ্পাঞ্জলি অর্পণ করিতে আসেন, তাঁহারা যে সাহসী বীর তাহাতে নিশ্চয়ই কোন সন্দেহ নাই।

কিন্তু আজ আমি ও এক খানা কাব্য গ্রন্থের ভূমিকা লিখিতে অনুরুদ্ধ হইয়াছি, কিন্তু এই কার্যে আমি যে সম্পূর্ণ অনধিকারী তাহা জানি, তবু বন্ধুজনের স্নেহের আদ্যু এড়াইতে না পারিয়াই এই দুঃসাহসিক কার্যে প্রবৃত্ত হইয়াছি। অতএব সুধীজন আমার এ ধৃষ্টতা মার্জনার চক্ষে দেখিবেন।

‘হিন্দুমতী’ কাব্য মহর্ষি বাম্বিকী বিরচিত পৃথিবীর শ্রেষ্ঠ কাব্য-ইতিহাস রামায়ণের এক করুণ-চিত্র লইয়া রচিত হইয়াছে। ধার্মিকাগ্রন্থ বিভীষণঅজ্ঞ তরণী-সংহারের ঘটনাবলম্বনে এই কাব্য বিরচিত হইয়াছে। কাব্যের নাম তরণী-পত্নীর কলিত নামানুযায়ী প্রদত্ত হইয়াছে। কবি নানা ছন্দে এই বিষয়টিকে লইয়া অতি সুন্দর সরল ও সরস ভাষায় কাব্য ধানি রচনা করিয়াছেন। লেখক প্রকৃত কবি, ভাব ভাষা ও ছন্দের উপর তাঁহার

অসাধারণ অধিকার। এই কাব্য প্রত্যেক সাহিত্য-রস-পিপাসু ব্যক্তির চিত্তরঞ্জন করিতে পারিবে বলিয়া ভরসা করি। ইহাতে ছন্দের এমনি একটী সহজ ও সরল গতি আছে যে উহা দ্বারা পাঠককে আপনা হইতেই কাব্যের প্রারম্ভ হইতে শেষ পর্য্যন্ত আকর্ষণ করিয়া লইবে। স্বর্গীয় আনন্দচন্দ্র মিত্রের মৃত্যুর পর পূর্ববঙ্গের আর কোনও কবি কাব্য পুষ্পাঞ্জলি দ্বারা বাণী সেবা করিয়াছেন কিনা তাহা আমার জানা নাই, সে হিসাবেও এ কাব্যের বিশেষত্ব আছে।

এখন লেখকের সম্বন্ধে দুই একটী কথা বলিব। রসিক বাবু বিক্রমপুরের প্রসিদ্ধ তারপাশা গ্রামের ভূম্যধিকারী রায়মহাশয় বংশধর। পদ্মা ইহাদের রাজপ্রাসাদতুল্য অনুপম বাস অট্টালিকা, জমিদারী ইত্যাদি স্বীয় কুক্ষিগত করিয়া এই বংশকে বোরতর দারিদ্র্যের মধ্যে নিক্ষেপ করিয়াছে, অর্থহীন হইলেও পূর্ববঙ্গীয় ব্রাহ্মণ-সমাজে ইহাদের স্থান অতি উচ্চে। লেখকের পরিচয়টুকু এই ক্ষেত্রে অনাবশ্যকীয় হইলেও উহার একটা সার্থকতা আছে বলিয়াই লিখিলাম।

আমি এ গ্রন্থের ভূমিকা লিখিতে বসিয়াও ভূমিকা লিখি নাই, শুধু একজন প্রকৃত কবিকে তাহার জায়া প্রাপ্য দেওয়ার জন্য যে সামান্ত চেষ্টা করিয়াছি, তাঁহাকে সাধারণের সমক্ষে উপস্থিত করিবার যে সৌভাগ্য-সুখ লাভ করিয়াছি সে গৌরবানন্দ টুকুই এখানে বিবৃত করিলাম। আশাকরি সমালোচকগণ ও সাহিত্য রস-পিপাসুগণ কাব্য নাম শুনিয়াই নাসিকা সঙ্কুচিত না করিয়া কাব্য থানা অভিনিবেশ সহকারে পাঠ করিয়া মন্তব্য প্রকাশ করিবেন, ইহাই আমার সনির্বন্ধ অনুরোধ।

৫৪।১নং নারিন্দা,

ঢাকা।

বঙ্গাব্দ ১৩২৩, ১৯শে জ্যৈষ্ঠ।

শ্রীযোগেন্দ্রনাথ গুপ্ত।



ইন্দুমতী-কাব্য ।

প্রথম সর্গ ।

দেবেন্দ্র-বাস্তিত রম্য রাবণ-আলয়
অতুল্য ভুবনে যেন সুষমা-ভাণ্ডার,
অম্বুধি পরিখা যার সৌধ হেমময়
নীলাকাশে ভাসে যেন ছবি চন্দ্রমার ।
কনক প্রাচীরে ঘেরা,—বিদ্যুতের ছটা
ঝলসিছে রবি-কঁরে ধাঁধিয়া নয়ন,
সুনীল জলধি—জলে প্রতিবিস্ম-ঘটা
নবীন নীরদ-কোলে দামিনী যেমন ।
দেউল উপরে রক্ষ সৈন্য অগণিত
নানা শস্ত্র-প্রহরণে স্তম্ভিত সবে,
সিংহদ্বার বজ্রসম লৌহ-বিনির্মিত
যমসম রক্ষীবৃন্দ ফিরিছে গরবে ।

হর্ষ্য-চূড়ে হেমময় কুস্ত সারি সারি
 স্ত্রশোভিত স্তরে স্তরে মাল্যের মতন
 বিজয় কেতন রিপু-গর্ব-খর্বকারী
 উড়িছে প্রাসাদোপরি মোহিয়ে নয়ন ।
 কর্বুর-শাসন-ভীত-চিত সদাগতি
 মন্দার-সুগন্ধ অঙ্গে করি বিলেপন
 প্রবাহিত অবিরত মুদুমন্দ গতি
 স্বর্গীয় সৌরভে হারে নন্দনকানন ।

মন্দাকিনী-ধারা হেন সুদিব্য বিপণি
 বহিছে সুপণ্য-বারি অনন্ত ধারায়
 শঙ্খ, মণি, হীরা, শুভ্রি, মুক্তা-প্রসবিনী
 সুনীল নীরজ পণ্য নয়ন ভুলায় ।
 রাজবহ্ন-পার্শ্বদ্বয় রহে সুসজ্জিত
 নয়নরঞ্জন-কর নানা ফুল ফলে
 বহে দধি, দুগ্ধ, ঘৃত ভার-সংস্থাপিত
 স্রোতস্বতী-স্রোত যথা অবিরাম চলে ।
 পশু-শালে নানা পশু বিহগ-মন্দিরে
 ধ্বনিত হতেছে কত সুমধুর তান,
 যন্ত্রালায়ে যন্ত্রীগায় মল্লার গন্তীরে
 বিছালায়ে করে প্রাজ্ঞ দ্বিজ সাম গান ।
 সুদিব্য ব্যায়ামালায়ে ভীম মল্লগণ
 প্রতিদ্বন্দী সঙ্গে রঙ্গ-দ্বন্দে নিয়োজিত,

রঙ্গমঞ্চে নাচে গায় নটী অগণন
 নয়নে সূঠাম কাম-চাপ নিয়ন্ত্রিত ।
 অট্টালিকা চূড়স্থিতা রাক্ষস-ললনা
 সূসজ্জিতা মহামূল্য বসন-ভূষণে,
 বিমুক্ত কুন্তলা হেরি অনিন্দিতাননা
 চন্দ্রমা সলজ্জমুখ লুকায় গগনে ।
 প্রাসাদের প্রতিবিন্ধ সরসীর জলে
 খেলিছে তরঙ্গ সঙ্গে সুরঙ্গ-মাধুরী,
 মর্ম্মর-সোপানে বসি রক্ষ-বালা দলে
 মনোরঙ্গে খেলে সঙ্গে সজ্জিনী সুন্দরী ।
 সে বিমল জলে ভাসে প্রফুল্ল কমল
 প্রিয়-প্রেমে উন্মাদিনী নাচিছে উল্লাসে
 সমীর-হিল্লোলে নাচে তরঙ্গের দল
 কল কলে কলহংস বিচরে সভাষে ।
 নীর-কেলি-কৌতুকিনী কর্বর-রমণী
 তরুণ যৌবনছটা উদ্ভাসিছে গায়,
 প্রেমোন্মাদে মন্থথের আলায়-রূপিনী
 উন্মুক্ত-বসনা রঙ্গে ভাসিয়া বেড়ায় ।
 সে অঙ্কি-কটাক্ষ হেরি তীরে কুরঙ্গিনী
 দাঁড়ায়ে নিম্পন্দ-কায় পলক-বিহীন,
 সমদৃষ্টি-সুখোন্মত্ত জলে পঙ্কজিনী
 দর্শনে দর্শনাক্ষয় তুলনে মলিন ।

সর-তীরে মনোরম্য রাজে উপবন
রতিকান্ত খেলে নিত্য বসন্তের সনে,
পঞ্চমে কোকিল করে মধুর কূজন
বিলায় সুবাস-সুধা মন্দ সমীরণে ।

অদূরে মন্দিরে গৌরী-মূর্তি প্রতিষ্ঠিত
সাধক নিয়তরত ইষ্ট-অর্চনায়,
শিব-ভক্ত নৈকষেয় ভক্তি অপ্রমিত
কর্বুর-অন্তরে প্রেম-পীযুষ খেলায় ।
মন্দোদরী-মনোহর, মনোহর পুরী,
বিশ্বকর্মা স্থায় করে সূচারু নির্মিত,
ধন্য বীর নৈকষেয় যাই বলিহারি
ত্রিভুবনে কীর্তি যার উপমা-বর্জিত ।
যার প্রেম-পাশে বন্ধা নগেন্দ্র-নন্দিনী
উগ্রচণ্ডা খাণ্ডাকরে রক্ষে গৃহ-দ্বার
পার্শ্ব বৈভবে লক্ষা-অতুল্য-অবনী
বিলাসের প্রতিমূর্তি বৈজয়ন্তী ছার !
হেন রক্ষাবাসে বন্ধ-স্যান্দন-বাসিনি
তরল-ভবনে পশ,—সুধার আধার
যথায় বিরাজে ইন্দুমতী সুহাসিনী,—
দেখাও নীরদ-মুক্ত-ছবি চন্দ্রমার ।
গৃহ অভ্যন্তরে নানা চিত্র মনোহর—
সুবাসিত ফুল-হার দেউলের গায়,

প্রথম সর্গ।

সুচিত্রিত উর্দ্ধভাগে চাঁদোয়া সুন্দর
ঝালরে মুকুতাপাতি সুষমা বিলায় ।
সুবর্ণ পর্য্যঙ্কোপরি কোমল শয্যায়
বিরাজিছে তরণীর হৃদয়-প্রতিমা,
দাসীবৃন্দ শশব্যস্তে চামরদোলায়
সতত প্রফুল্ল সেই বদন-চন্দ্রিমা ।
যৌবন-তরঙ্গ অঙ্গে পূর্ণ কলেবর !
বিচিত্র কবরী শোভে সে চাচর কেশে,
শ্রবণে কুণ্ডল দোলে নেত্র-ভূষিকর
ইন্দু-দ্যুতি গজমতি ভাতে গল দেশে ।
হরিমান-হারি কটি স্বর্ণ চন্দ্রহারে
ধরেছে কি চারু শোভা ! অলঙ্কৃত অধরে
কমল-কোমল-কর বলয়ের ভারে
আমরি ! ভাসিছে যেন, চন্দ্রমা নখরে !
অঞ্জন-রঞ্জিত নেত্রে বঙ্কিম সুঠাম
কি অপূর্ব দন্ত-ছটা জিনিয়া দামিনী,
স্তনে যৌবনের ধ্বজা উড়াইয়া কাম
কটাক্ষে নিক্ষেপে বাণ রূপে সৌদামিনী ।
গন্ধর্ব-বিজয়-লব্ধ রমণী রতনে
অপিয়া হৃদয়ানন্দে নন্দন-প্রতিম—
রঞ্জেন্দ্র স্বপ্রিয়তম সরমা-নন্দনে
রেখেছে স্বগণ-প্রেম-কীর্তি নিরুপম ।

নিশি হাস্যময়ী যথা শশী আগমনে
 ভাসিল দম্পতি দৌহে আনন্দের নীরে
 প্রীতি-মন্দাকিনী বহে সরমার মনে
 নিরখি মিলিত যেন কমল-মিহিরে ।
 সরলা স্মৃশীসা বালা জীবনে কখন—
 নাহিজানে বিষাদের কেমন যাতনা
 বসন্ত-সন্তোগশীলা প্রকৃতি যেমন
 লীলাময়ী অমলিনা সহস্র আননা ।
 বিগত নীশিথে হেরি অতি কুস্বপন,
 কাঁপিছে সভয়ে সতী আকুল অন্তরে,
 প্রবেশিলে রুদ্রপীড় সমর-প্রাঙ্গন
 কাঁপিলা ঐন্দ্রিলা-বধূ যথা থর থরে !
 সঘনে বহিছে শ্বাস মলিন বদন,
 ঢাকিল চন্দ্রমা যেন কলঙ্ক অশ্বরে
 অশ্রু-বিন্দু নেত্র-প্রান্তে দিল দরশন
 অমলা সঙ্গিনী প্রতি কহিলা কাতরে :—

“শুন অমলা স্বজনি,	আমার হৃদয়খানি
থাকি থাকি মাঝে মাঝে	কাঁপি কেন উঠিছে ?
যখন শুনিনু রণে,	মকরাক্ষ রাম-বাণে
চিরতরে মহাবাহু	মহানিদ্রা গিয়েছে
তদবধি মমপ্রাণ,	জ্বলে ইন্ধন-সমান
কত বিভীষিকা-সিঙ্ধু	উত্তালিত হৃদয়ে ।

নাচিছে দক্ষিণ আঁখি
 যেন প্রাণ-পোষাপাখী
 গত নিশিশেষ যাম
 ইন্দুর হৃদয়-ইন্দু
 “প্রমদে বিদায় চাই,
 ভুজ-পাশে প্রেমাবেশে
 পতি কাল-রণে যান
 ধমনী-শোণিত মম
 যেন ছিন্ন-মূল লতা
 শশাঙ্ক স্ননীল যেন
 হৃদয়ে দারুণ জ্বালা
 ভুজ-পাশে-স্বামী পাশে
 “তোমারে হৃদয়ে ধরি
 গভীর গহন বনে
 না চাহি রাজত্ব ধন
 সুরম্য এ হর্ম্যোপরি
 ভ্রমি ভিখারিণী-বেশে
 ছায়ার আকার আমি
 নতুবা জলধিজলে
 দৌহে মিলি এককালে
 আগে দিয়ে ভালবাসা
 পশিতে দিবনা নাথ !

দশদিশি শূন্য দেখি
 উড়েগেল পালিয়ে ।
 কি স্বপন হেরিলাম
 রণ-বেশে বর্ণিল—
 রৌঘব-সমরে যাই”
 গল দেশে জড়িল
 সঘনে কাঁপিল প্রাণ
 শুকাইল হৃদয়ে !
 শোকে হ’নু অবনতা
 হল রাত্ত-উদয়ে ।
 জড়ায়ে পতির গলা—
 বলিলাম বিনয়ে,
 স্ননীল বারিধি তরি
 যাব আজি পালিয়ে ।
 দাস দাসী আভরণ
 বাস নাহি করিব ।
 বনে বনে নানাদেশে
 সাথে সাথে চলিব ।
 নীলাম্বর অশ্রুতলে
 প্রবেশিব গোপনে ।
 নিরাশায় সপে আশা
 একা রণ-অঙ্গনে ।

কিম্বা দাও তরবারী
 তোমার সমক্ষে প্রাণ
 তোমারে সমরে দিয়া
 কোন্ প্রাণে ছাড় প্রাণ
 চারিদিকে অলক্ষণ
 থেকে থেকে মাঝে মাঝে
 দিবাভাগে ডাকে শিবা
 সেধ্বনি অশনি সম
 কক্ষোপরে রক্ষ-নারী
 স্বীয়বক্ষে কর হানি
 মকরাক্ষ রমণীরে
 তদবধি পোড়া প্রাণ
 বলিতে বলিতে সখি
 হতজ্ঞান হয়ে যবে
 পরে যা দেখেছি আর
 বর্ণন করিব কিবা
 যখন প্রভাত কালে
 লঙ্কেশ সাস্তুনা তরে
 মহাবীর পতি যার
 কত দুর্ভাবনা মম
 না জানি কন্ঠের কথা
 ভবিতব্য অভাগীরে

নিজমুণ্ড খণ্ড করি
 এখনি যে ত্যজিব ।
 একা ঘরে কিবা নিয়া
 ধরি দিন যাপিব ?
 শকুনি গৃধিনিগণ
 এপ্রাসাদে বসিছে,
 কাক নিশি ভাবে দিবা
 হৃদয়েতে বাজিছে !
 পতি, পুত্র নাম স্মরি
 হাহাকার করিছে !
 হেরিয়ে বিধবাকারে
 ঘন ঘন কাঁপিছে ।
 আবিষ্ট হইল আঁখি
 পড়িলাম ঘুমায়ে ;
 নাসরে রসনা তার
 কম্প হয় হৃদয়ে ।
 প্রিয়তম সভাস্থলে
 দ্রুতপদে চলিল,
 সেজানে অন্তর তার
 হিয়া মাঝে উদিল ।
 কিমোর রয়েছে গাঁথা
 ভাসাবে কি পাথারে ?

কি করেন হৈমবতী	সকল নিয়ন্তা সতী
অবলার ভেলা তিনি	ভব-সিন্ধু মাঝারে।”
বীণা-বিনিন্দিত স্বরে	এতেক कहিয়া পরে,
ইন্দুমতী নেত্রে পুনঃ	অশ্রু-বিন্দু ঝরিল,
বরষি অমিয়রাশি	“সরলা অমলা বসি
মৃদুস্বরে ধীরে ধীরে	প্রবোধিতে লাগিল !
“নাভাবিও প্রাণ সখি !	মুখ-পদ্ম ম্লান দেখি

দহে প্রাণ বিবাদ-দহনে,

সুরাসুর বিছাধর	প্রকম্পিত কলেবর
----------------	-----------------

যাঁর বাণে ত্রাসিত শমনে।

মর্কট, নরের সনে	যদি তিনি যান রণে
-----------------	------------------

হেলায় দলিবে রিপুদল,

যশঃমাল্য গলে পরি	ইন্দু-ফুল বক্ষে ধরি
------------------	---------------------

পিবে তার সুধা পরিমল।

‘স্বপন অলৌক কথা	ভাবিনা পাইও ব্যথা
-----------------	-------------------

দিবা ভাগে যাহা ভাবে মনে—

যামিনীতে নিদ্রা-কূপে	তাহারে স্বপনরূপে
----------------------	------------------

প্রতিবিশ্ব যেমন দর্পণে।

“বৃথা চিন্তা পরিহর,	অন্তরে ধৈর্য ধর
---------------------	-----------------


অজেয় সমরে তব পতি ;

চল প্রিয় সহচরি,	উছানে ভ্রমণ করি
------------------	-----------------

দূরে যাবে মনের এগতি।

বন-লতিকার সনে কুসুমিত কুঞ্জবনে
 গোলাপের উদ্বাহ ঘটাব,
 কুহরিবে পিকবঁধু ভ্রমর ঢালিবে মধু
 বর-কর্ত্তা তোমায় সাজাব ।
 কণ্ঠ্যার জননী আর্মি দুঃখ ভাই নাই স্বামী
 কল্লনায় হইবে মিলন !
 বভ্রপি ভাগ্যের বশে কুমার সে কুঞ্জে পশে
 সপ্তপাক ঘুরাব তখন !
 অমলার রস-ভাষে, ইন্দুমতী-হৃদাকাশে
 সুখ-ইন্দু এবে সমুদিল,
 সরলা সঙ্গিনী সঙ্গে কথান্তর সুপ্রসঙ্গে
 মনোরঞ্জে উঠানে পশিল ।





দ্বিতীয় সর্গ ।

বিচিত্র রাবণ-সভা অতুল ভুবনে
 দেবশিল্পি-বিনির্মিত স্বর্ণে গঠিত,
 স্বাচ্ছাদিত দিব্য-জাত-রূপ আস্তুরণে
 স্তম্ভমালা মহা মূল্য প্রবাল-মণ্ডিত ।
 সুরঞ্জিত আলোদান মণির প্রভায়
 প্রদীপ্ত রয়েছে মরি ! সূচরু দর্শন,
 উর্দ্ধদেশে চন্দ্রাতপ সুষমা বিলায়
 ঝালরে মুকুতা-মালা নক্ষত্র যেমন ।
 কৃতান্ত-কিঙ্কর সম দ্বার-পাল গণ,
 সুসজ্জিত বশ্ম-চশ্মে তীক্ষ্ণ অসিকরে
 নির্ভয়ে রক্ষিছে দ্বার মুরতি ভীষণ
 কর্ণবুর-শাসনে বেগে বায়ু না সঞ্চরে ।
 সুরম্য মন্দার-মাল্য বাসব-রচিত
 দোলিছে অমর-সর্ব-গর্ব-খর্ব করি,
 মকরন্দ—অঙ্ক ভৃঙ্গ-গুঞ্জনে গুঞ্জিত,
 বিজ্ঞাপিছে রক্ষেন্দ্রের বীরত্ব-মাধুরী ।

কুবের স্বকর-কৃত যত্ন-সংস্থাপিত
 রয়েছে বিচিত্র সাজে বিবিধ ভূষণ ।
 সশঙ্কে সভার বস্ত্র ক'রে পরিকৃত—
 সুবিশ্লস্ত করে নিত্য ছায়ার নন্দন ।
 অন্ত-কান্ত-গর্ব-অন্ত অশ্ব-বল্লাধারী
 কৃতান্ত ত্রাসিতান্তর বিনত্র আননে
 দ্বারেতে দণ্ডায়মান দণ্ড-মান হারি
 পবন ব্যজন রত বিনীত বদনে ।

পাত্র মিত্র সমবেত যুক্ত যুগ কর,
 বন্দী-গণ যথা স্থানে রয়েছে নীরবে
 হেন কালে শঙ্খ-ধ্বনি হল ঘোরতর
 রাজ-আগমন জানি দাঁড়াইলা সবে ।
 পূরিল স্বর্গীয় ভ্রাণে সে সভা-ভবন
 প্রবেশিলা সভা-তলে কর্ণবুর দুর্ব্বার
 দশমুণ্ড বিশ আঁখি ভীষণ-দর্শন
 নিবিড় দেহের বর্ণ নীরদ-আকার ।
 মণিময় সিংহাসনে সুবেশে সজ্জিত
 উপবিষ্ট মহাকার নিকষা-নন্দন,
 ছত্রধর ধরে ছত্র সূচাকু চিত্রিত
 দোলায় চামর দব্য অনুচর গণ ।
 দানব-সভায় যেন শুস্ত দৈত্যেশ্বর
 রক্ষ রথী মাঝে রাজে লঙ্কেশ রাবণ,

পুত্র-শোকে আকুলিত সন্তপ্ত অন্তর
নিস্তরক বিমর্ষ ঘোর সজল নয়ন ।
শোকাকুল সভাবৃন্দ নির্বাক অচল
উপবিষ্ট ভূমি পরে ত্যজিয়া আসন,
চিস্তিত আকুল ক্ষুদ্র রাজ-মন্ত্রী দল—
রসনা অবশ ভাষে মলিন বদন ।

সুদীর্ঘ নিশ্বাস ছাড়ি বহুক্ষণান্তরে
কহিলা নিকষাত্মজ সজল নয়নে,
“বিধি প্রতিকূল যার ভুবন ভিতরে
বিফল লাঞ্ছনাময় জীবন ধারণে !
হায়রে ! ক্রমশঃ যত লক্ষা-অলক্ষার
ডুবিল এ ছার নর-সংগ্রাম-সলিলে,
কোন্ লাঞ্জে স্নান মুখ দেখাব সংসারে
এলাঞ্ছনা ছিল শেষে রাবণের ভালে ?
দুর্ব্বার অরাতি-করে বন্দী শৃঙ্খলিত
পূর্বের ছিন্ন হস্তপদ মস্তক তৎপরে ।
অন্তিমে সে প্রতিহিংসানে প্রজ্জ্বলিত
মরে যথা মনস্তাপে স্ববীরহ স্মরে—
তেমতি দুর্দশা মোর রাঘবের রণে
ছিল যত অঙ্গ-শোভা অঙ্গজ গৌরব
ছিন্ন শির বিলুপ্তিত কাল রণাঙ্গনে
অচিরে জেনেছি স্থির হতে হবে শব ।

কোথা ভাই কুস্তকর্ণ অরাতি-দলন
 জিনি অবহেলে স্বর্গ, মরত, পাতালে
 স্থাপিলা সূযশঃ স্তম্ভ বীর-প্রলোভন
 দুর্ভাগা হেরিয়ে মোরে ত্যজিলে অকালে !
 কেমনে ভুলিয়া আমি তোমার বদন
 নিরাশায় আশা-বারি করিয়া সঞ্চার
 এস ভাই এস বক্ষে জুড়াও জীবন
 নৈলে রক্ষ-যশঃ জ্বলে জ্বলন্ত অঙ্গার !
 কোথা রলে অতিকায় দুর্জয় কুমার
 নয়ন-নন্দন মম হৃদয়ের ধন,
 নেহার সে মকরাক্ষ নাহি ভবে আর
 স্বকরে শৈশবে যারে করেছ পালন ।
 আয় বাপ মকরাক্ষ অভাগা হৃদয়ে
 না দেও উত্তর কেন ? জীবনের পাখি ।
 নাহি আর রণ-সাধ, তোমা বক্ষে লয়ে
 যাব বনে, সবে মোরে দিয়ে গেলি ফাঁকি ?
 না চাহি পার্থিব সুখ স্বর্গ-সিংহাসন
 বৈর-নির্যাতন ব্রত ভঙ্গ এত দিনে
 লঙ্কার সূযশঃ ডঙ্কা হইল নিশ্বন
 সূৰ্পনখা-প্রতিশোধ বিলীন বিমানে ।”
 এত বলি রাক্ষসেন্দ্র উন্মাদের প্রায়
 দশনে দশনে করে ভীম সংঘর্ষণ

কভুবা স্বকরে মুণ্ড উৎপাটিতে চায়
 কভু বলে নীল-নীরে ত্যজিব জীবন ।
 বিবিধ বিধানে সুস্থ করি সভ্যগণ
 নিকষা নন্দনে তোষি শত নমস্কারে
 করযোরে বৃদ্ধ মন্ত্রী কহিলা সারণ
 “জ্ঞানী-শ্রেষ্ঠ মহারাজ বিদিত সংসারে ।
 কি আছে অজ্ঞাত তব,—অনিত্য সংসার
 ধ্বংসাধীন জড় দেহ, নশ্বর স্বজন,
 নহে নিত্য ঐশ্বর্য্যাদি সকলি অসার
 মায়ার প্রপঞ্চে চিন্তি অক্ষয় আপন !
 দেহীর শরীরে যথা কৌমার, যৌবন,
 জড়তাদি যথা কালে দেহে সমুদ্ভূত
 তদ্রূপ জীবাত্মা ছেড়ে দেহ পুরাতন
 কাল পূর্ণে নব দেহে প্রবেশে নিয়ত ।
 করমের লীলা ভূমি এতব ভবন
 জীবাত্মার দেহান্তর কন্ম-অনুযায়ী,
 তৃণান্তর তৃণে যথা জলৌকা-গমন
 সূক্ষ্ম দেহে প্রবেশে সে আত্মা চিরস্থায়ী ।
 প্রকৃতিতে পরাভাস সংযোগ-বিয়োগে
 জন্ম-মৃত্যু-উপলব্ধি মমত্ব-বিকাশ,
 আত্মা, পরমাণু নিত্য অব্যয় প্রয়োগে
 যোগে জন্ম,—মৃত্যু ভেদে,—ঘটাকার নাশ !

কমলে কমল-বিশ্ব উৎপত্তি সংস্থিতি
 ক্ষণ অবস্থিতি অন্তে জলেতে বিলয়,
 পঞ্চভূতে জড়দেহ অস্থায়ী উৎপত্তি
 অন্তের প্রপঞ্চ পুনঃ পঞ্চ পঞ্চ লয় ।
 রূপান্তর ভেদ যদি শোকের কারণ
 সম্মানে নিরখি কার মানস বিকল
 শৈশব, কিশোর, প্রৌঢ়, বার্কক্য, যৌবন
 কাল-ভেদে রূপ-ভেদে ফেলে অশ্রুজল !
 এজগৎ রঙ্গক্ষেত্র প্রপঞ্চের খেলা,
 কস্ম-অনুযায়ী জীব নব বেশ ধ'রে
 আসে যায় বারংবার নিয়তির মেলা
 কভু পুত্র, কভু পিতা, দয়িতা-আকারে ।
 জ্ঞান-অস্ত্রে মোহ-পাশ হলে বিখণ্ডিত
 মহামায়া-মোহাচ্ছন্ন চঞ্চলাত্মা মন
 কভু নাহি শোক তাপে হয় বিচলিত
 পদ্ম-পত্র-নীর প্রায় নির্লিপ্ত জীবন !”

বিষাদে নিশ্বাস ছাড়ি কহিলা রাবণ
 ‘যা কহিলে সত্য মন্ত্রি !—হার ভূমণ্ডল
 সূতিকা-মন্দিরে জ্বলে স্মৃতি-হতাশন
 জ্ঞান-চক্ষু অস্তিমের চিতার অনল !
 ক্রীড়া-পুত্তলিকা যথা চালক-ঈজিতে
 সূত্র-আকর্ষণে নাচে ক্ষণে বসে, ধায়

কৰ্ম-সূত্র-অনুগামী তথা পৃথিবীতে
 কে না জানে জীব মন্ত অনিত্য খেলায় ?
 শ্মশান-বৈরাগ্যে মন্ত দাহক যেমন
 স্থানের মাহাত্ম্যে ভাবে অনিত্য সংসার,
 দাহান্তে ভবনে করি প্রতি-আগমন
 পার্থিব বিষয়ে মন্ত হয় যে যাহার ;
 তেমতি অবোধ প্রাণ প্রবোধ না মানে
 এমনি বিচিত্র লীলা অব্যর্থ মায়ার
 পশু, পক্ষী, নাগ, নর, গন্ধর্বের প্রাণে
 অন-অতিক্রম্য ঘাঁর প্রভাব বিস্তার !
 একটি করভে কেহ টানিলে সবলে
 অমনি গরজি উঠে মন্ত মাতঙ্গিনী !
 অবিরত হৃদি-রত্ন ডুবায়ে অতলে
 কেমনে কাটিবে মন্ত্রি ! দিবা-নিশীথিনী !
 নিত্য নব শোক-বহ্নি হয়ে প্রজ্জ্বলিত
 দহিছে উপযু্যপরি অন্তর আমার
 গেল মান, গেল সুখ, কীর্তি অন্তহত
 স্বর্ণ-কিরীটিনী লঙ্কা শ্মশান-আকার !”
 কহে মন্ত্রী “পুত্র তব সম্মুখ সমরে
 দলিয়া বিপক্ষ পক্ষ লভি বীর-বশঃ
 নিবসে অনন্ত সুখে আনন্দ-নগরে
 বীর-ধর্ম্যে হেন মৃত্যু ত্রিলোক-পৌরষ !

নিয়তির কার্য্য ভবে জীবন মরণ
 পার্থিব জীবের তাহে নাহি অধিকার
 অপ্রতিবিধেয় কার্য্যে ধীমান কখন
 হয়ে লিপ্ত ছাড়ে কি সে কর্তব্য তাহার ?
 সম্মুখে ভীষণ রিপু বিজয় হুঙ্কারে
 কাঁপাইছে মুহুমূহু সুনীল গগন,
 পুলক-হস্তা ভ্রাতৃ-ঘাতী-তীত্র টিটকারে
 কাপুরুষ সম থাকা সাজে কি এখন ?
 বধিয়া স্বকুলান্তকে অরাতি-শোণিতে
 অমুজ তনয়-শোকে করহ তর্পণ
 শাস্তকর কাস্ত-হারা-পতি-শোকায়িত্তে
 পড়ে যেন প্রতিহিংসা সলিল-সিঞ্চন !
 উত্তরিল রোদ্র-বেশে নিকষা-নন্দন
 রাবণ-গস্তীর নাদে অবনী কাঁপিল
 যেনরে পর্ব্বতোপরি অশনি পতন
 অথবা অকালে যেন জলধি গর্জ্জিল
 সত্য ভাষে সন্তোষিলে অমাত্যপ্রবর
 শোকে ছিনু আত্মহারা অবলার প্রায়
 বজ্রসম দৃঢ়তম এবে এ অন্তর
 যাবৎ অরাতি-নাম লুকাই ধরায়
 প্রতিহিংসা-ভীমানল তীত্র উদগীরণ
 হয়ে অগ্নি সম হল অন্তর আমার

সূৰ্পনখা-প্রতিশোধ জাগিল ভীষণ
 প্রতিহিংসা দীক্ষা-মন্ত্র, প্রতিহিংসা সার !
 শোষিব অম্মুখি-বারি তীব্র শরানলে
 দহিব রাঘবদ্বয়ে তুণের মতন
 আনিব বাঁধিয়া দুষ্ঠ দেব আঁখণ্ডে
 কে আটে সমরে আজি দেখিবে ভুবন !
 ইন্দ্রজয়ী ইন্দ্রজিৎ কুমার আমার
 আদেশ সৈনিকবৃন্দে, সাজাও বাহিনী
 তরণী স্বপ্রাণাধিক, সাজরে কুমার
 বীরবাহু, বাহুবলে কাঁপাও অবনী !
 ঘুচাইব দেবেন্দ্রের চাতুরী সকলি
 বাহুবলে উপারিব অমর নগরী
 কাটি তিল সম করি বানর মণ্ডলী
 বধিব যুগলে মরে পরশু প্রহারি ।
 এত বলি রক্ষ-রাজ করে আশ্ফালন
 কুড়ি চক্ষু উগারিছে জ্বলন্ত অনল
 কড়মড়ে প্রকম্পিত রত্ন-সিংহাসন,
 পদভরে লক্ষা যেন করে টলমল ।
 দুৰ্জ্জয় রাবণ-বাক্য করিয়া শ্রবণ
 রক্ষ মহারথী সবে করে সিংহনাদ,
 সজল জলদ যেন বিদারি গগন
 বায়ুভরে করিল সে ভীষণ নিনাদ

বাজিল দুন্দুভি ঘোর রক্ষ সভাস্থলে
 মাতিল অররুবন্দ বীরত্ব-গরবে
 হয়, হস্তী, রথেরথী পদাতিক দলে
 কাঁপিল ত্রিদশ-নাথ সে ভৈরব রবে





তৃতীয় সর্গ।

পরম পবিত্র স্থান কৈলাস ভূধর,
কোটি শরদিন্দু সম প্রভা উদ্ভাসিত,
শিরে শোভে দ্রুম-মালা রমা মনোহর
ধূর্জটি রয়েছে যেন জটা-বিভূষিত ।
হরিতকী, হল্লাতকী, ধূস্তর সুন্দর
হর-প্রিয় দেবদারু, রুদ্রাক্ষ শ্রীফল
ধাত্রী, নীলকণ্ঠ,—নীলকণ্ঠ—নেত্র-হর
তরুরাজি শোভা পায় সূচারু শ্যামল ।
মন্দার-সুগন্ধামোদে সদা আমোদিত
ত্রিদিবেন্দ্র মনোরম্য ভবেন্দ্র ভবন
প্রফুল্ল প্রসূন চারু ভূষণ-ভূষিত
অপ্সর, কিন্নর, যক্ষ-প্রিয় নিকেতন ।
মকরন্দ-লুপ্ত-অঙ্ক নিত্য মধুকর
গুঞ্জনে গাইছে ভব-প্রেম-গুণ-গান,
মোহন মধুর তানে বিহঙ্গ নিকর
বিভুর মহিমা ঘোষে বিমোহিয়া প্রাণ ।

প্রেমোন্মাদে উন্মাদিনী লতিকা স্তম্ভরী
 ভুজ-পাশ-আলিঙ্গনে তোষে তরুবরে
 বিটপি স্ব-অঙ্গ ভূষা উন্মুচিত করি
 সাজায় কুসুম-সাজে প্রীতি-উপহারে ।
 বংশ-রন্ধ্রে স্মীরণ গুহাগত-গতি
 কিন্নরী-গান্ধার-তানে ধ্বনে সমতান
 লুপ্তিত অঞ্চলা যত গন্ধর্ব্ব যুবতী—
 চঞ্চল মানসে পশে ফুল-ধনু-বাণ
 গগু-কণ্ঠয়ন-রত মাতঙ্গিনী দল
 শাল-সংঘর্ষণে দিবা ক্ষরিছে নির্যাস,
 সে সৌরভে মাতোয়ারা অপ্সরী অমল
 সবলে টানিছে গলে প্রণয়ের পাশ !
 বসন্ত অনন্ত স্থখে বিরাজে তথায়
 পঞ্চমে কোকিল করে সদা কুহুধ্বনি,
 বিহগ-কাকলি নিত্য পীযুষ বিলায়
 সাগর-সঙ্গম-সাধে ঝরে মন্দাকিনী ।
 নির্ঝরিণী জল-কণা সদা মাখি গায়,
 মনোরঞ্জে খেলে মুদু মন্দ স্মীরণ,
 গতি-শীলা চমরীর বিচিত্র খেলায়
 কিন্নরী-উন্মুক্ত-বন্ধে চামর-ব্যঞ্জন ।
 কটিতে নয়ন-হরা সৌদামিনী-খেলা
 নবীন নীরদে সাজে মেখলা উত্তম,

শাখী-শাখে শিখী-শ্রেণী—পেখমের মালা
 শত ইন্দ্র-ধনু বলি হয়ে যায় ভ্রম ।
 চক্রবাক দল-বন্ধ স্পর্শিছে গগনে
 যখন সে শ্রেণী রাজে অর্ধচন্দ্রাকৃতি
 তোড়ন-শোভিনী মাল্য স্তম্ভের বিহনে
 নিরালম্ব উর্ধ্ব পানে ঝুলিছে যেমতি ।
 করভ কেশরী—শিশু খেলে নিরন্তর
 হরিণী বাঘিনী সনে অদ্ভুত মিলন,
 নকুল-ভূজঙ্গ-রঙ্গ দৃশ্য মনোহর
 হিংসা ঘেষ বিবর্জিত প্রীতি-নিকেতন ।
 মোহিনী প্রকৃতি যেন পরি নীলাম্বরী
 ভূলাইল বাসবের সহস্র নয়ন
 কহিল দেবেন্দ্র “আহা ! বৈজয়ন্তী পুরী
 শতাংশের তুল্য নহে নয়ন-রঞ্জন ।
 ইচ্ছা হয় দেববৃন্দ ত্যজিয়া অমরা
 জগত-শরণ্য নিব্বাকাজ্ঞ শঙ্করের
 অনুসরি পদ-চিহ্ন নিয়ত আমরা—
 বীত-রাগী হ’য়ে দুঃখ-দাতা বিলাসের ।
 নেহার বিটপিতলে কত মুনিগণ
 জানু-সমুদ্ভূত-দ্রুম-ক্লেশ বিবর্জিত
 বিভূ-পদ-কোকনদ-ধানে মত্ত মন
 ধর্মের বিমল বিভা অঙ্গে উদ্ভাসিত ।

সংসারে পরম সুখী নির্লিপ্ত যে জন
 সম্পদ বিপদ তার সমভাব জ্ঞান
 স্বার্থে রত দেব ভালে হেন বিড়ম্বন
 সন্তোগ-বাসনা ঘোর নরক-সোপান !
 এত বলি বজ্র-পাণি হলে অগ্রসর
 দেখিলা অদূরে নন্দী ভীম শূল করে,
 দ্বারে দ্বারী বেশে যেন দ্বিতীয় শঙ্কর
 স্বাগত জিজ্ঞাসে ইন্দ্রে পরম সাদরে !
 দেবেন্দ্র কহিল “ভ্রাতঃ কি কহিব আর
 অধম দাসত্ব-বৃত্তি কলঙ্ক-কালিমা
 সমষ্কিত দেবকূলে, লিপি বিধাতার
 বিলুপ্ত কর্ণবুর করে ত্রিদিব-গরিমা !
 কহে নন্দী শান্ত চিতে “নন্দন বিহারি!-
 অন্তরে ভাবহ দেব ভব শিবময়
 ও পদ বিপদার্ণবে অকূলে কাণ্ডারী
 অমর মরের করে অপরে অভয় ।
 সন্তোষে ছাড়িছু দ্বার পশ অন্তঃপুরে
 নিরখিবে একাসনে হর-হৈমবতী ।”
 দেবেন্দ্র বিনয়ে কহে “আশ্বাসিত স্বরে
 বহিল অন্তরে মম সুখা-স্রোতস্বতী ।
 দেবগণ-আগমনে আমোদ-বিহ্বল
 ডাকিনী যোগিনী রঞ্জে উঠিল নাচিয়া

প্রেতিনী, বেতাল তাল যেনরে পাগল,
 ভূতগণ-সঙ্গে নাচে “তাধিয়া তাধিয়া ।”
 রক্তাক্ত রক্তেন্দ্র রণে শ্রান্ত সুরগণ
 উপনীত অস্ত-কান্ত কামাস্ত-সদনে
 নিরখি প্রশান্ত মূর্তি চন্দ্রমা-ভূষণ
 প্রেম-মন্দাকিনী শ্রোত সঞ্চারিল মনে ।
 রত্ন-বেদী সমাচ্ছন্ন ব্যাঘ্র-চর্ম্মাসনে
 তত্পরি উপবিষ্ট দেব মৃত্যুঞ্জয়,
 ললাট দহিছে যেন তীব্র হতাশনে
 মস্তকে গর্জ্জয়ে ফণী গরল-আলয় ।
 শিরে শোভে জটাজুট শৈলরাজি প্রায়
 পতিত-পাবনী গঙ্গা যাহে বিরাজিত,
 প্রদীপ্ত ললাট অর্দ্ধ চন্দ্রমা-প্রভায়
 ধবল জলদ-অঙ্গ ভস্ম-আচ্ছাদিত ।
 পরিধান বাঘাস্বর শিঙ্গা, শূল করে
 অস্থি-মাল্য গজ-দেশে উদর লম্বিত
 ধৃস্তর কুস্তম কর্ণে কিবা শোভা ধরে
 প্রশস্ত নয়ন ত্রয় ধ্যানে নিমীলিত ।
 বিরজিতা শিব-পাশে দেবী হৈমবতী
 শুভ্র মেঘ-কোলে যেন স্থিরা-সৌদামিনী
 অর্ঘ্য অঙ্গে দেবগণ, বৈজয়ন্তী-পতি
 ক্রমে নমে মহেশ্বর, নগেন্দ্র-নন্দিনী ।

“জয় শিব দিগম্বর ভুবন-কারণ
 অনাদি অনন্ত দেব ত্রিগুণ-আধার
 সৃষ্টি, স্থিতি লয়-কারী জয় ত্রিলোচন
 সগুণে নিগুণাত্মক ব্রহ্ম নিরাকার ।
 ক্ষিতি, অপ, তেজ, ব্যোম, মরুত, ভাস্কর
 অখিল, সংসার, সোম তোমার মূর্তি—
 স্মৃতি, কুমতি, বিদ্যা, অবিদ্যা-আকর
 তোমাতে উৎপত্তি, লয়, তোমাতেই স্থিতি
 সত্ত্ব, রজঃ, তমোগুণে ব্রহ্মা, বিষ্ণু, হর
 ব্রহ্মারূপে করি সৃষ্টি পাল বিষ্ণুরূপে
 সংহার শঙ্কর-রূপে শশাঙ্ক-শেখর
 অনন্ত ব্রহ্মাণ্ড তব গুপ্ত রোম-কূপে ।
 অচিন্ত্য, অব্যক্ত রূপ ব্যাপ্তি জগন্ময়
 অনন্ত মহিমা তব কে বর্ণিতে পারে
 আত্মারূপে সর্ব্ব ঘটে বিরাজ চিন্ময়
 প্রণমামি বিশ্বরূপি জগত-আধারে ।
 নীলকণ্ঠ, শ্রীনিবাস, ধূর্জটি, শঙ্কর
 ব্যোমকেশ, ত্রিপুরারি, ত্র্যম্বক, ঈশান
 বাঙ্গাপূর, পঞ্চানন, যোগীন্দ্র, ঈশ্বর
 নমি আমি দেব দেব পুরুষ-প্রধান ।”
 আশুতোষে তোষি হেন সহস্রলোচন
 নমিলা তৎপরে গৌরী-পদ-কোকনদে

ভূমে বিলুপ্তিত প্রেমে পরিপ্লুত মন
করিল। অশেষ স্তুতি অম্বিকা-শ্রীপদে ।

প্রণমামি ভোগবতি প্রকৃতি-পুরুষাকৃতি
মহামায়া জননী আকারে
গুণত্রয়-প্রসবিনী মহানির্ব্বাণ-কারিণী
কুলকুণ্ডলিনী মূলাধারে
সার্ক ত্রিবলয়াকারে শয়ন্ত-বেটন ক'রে
নিদ্রাগত ডাকিনী সঙ্গিনী
তুমি মাতঃ সাধিষ্ঠানে বিষ্ণু-শিব-সন্নিধানে
ষড়দলে শক্তি রাকিনী ।
দশদলে নাভী প'রে বিরাজ মা মণিপু্রে
রুদ্রসঙ্গে লাকিনী মূরতি
অনাহতে দ্বাদশদলে কাকিনী জুদি কমলে
ঈশ্বরী ঈশ্বর সনে স্থিতি ।
রাজ বিশুদ্ধ কমলে ষোড়শ সরোজ-দলে
সাকিনী আ সদাশিব-রমা,
দ্বিদলে হাকিনী সাজে ত্রিবেণীতে ক্রমাবে
পরঃ-ব্রহ্ম-প্রদায়িনী বামা ।
শিব-শক্তি যুক্তাকারে বিরাজ মা সহস্রারে
সহস্র সরোজ-দলে পরে,
সে কমলে চারুশোভা দিব্য সুরক্তিমা আভা
নাদিবিন্দ নিম্নে শোভা করে ।

স্বর্ণ কপাট খুলে যদি কারু ভাগ্য-বলে
মায়া-যুক্ত জীব মুক্তি পায়
ভব-জঠোর-যাতনা বিষ-বিষয়-বাসনা
ঘুচেতার শমনের দায় ।
তবু বন্ধ মায়া-ডোহর, বিশ্ববাসী নারীনরে
সদা করে অসার ভাবনা,
ভ্রমেও ভাবেনা ইচ্ছা অনিষ্টে ভাবিয়ে ইচ্ছা
ভোগে কষ্ট নরক-যাতনা ।
নরে কি বলিব আর, অনন্ত প্রভব যাঁর
কার সাধ্য রোধে তাঁর গতি ?
আবদ্ধ বিবুধকুল নিত্য বিমোহিতাকুল
ভোগে সদা কতবা দুর্গতি ।
লভিয়া ইন্দ্র-পদ ভুলিপদ-কোকনদ
বিপদ বিচরে ছায়া-কারে,
বর-বলে মহাবলী বলীরণে হীনবলী—
স্বরমগ্ন বিষাদ-পাথারে ।
সুন্দ, উপসুন্দ দৈত্য ত্রিদিবে করিল নৃত্য
নিত্য-কৃত্য দেব-নির্যাতন
বৈজয়ন্তী পরিহরি পাতালে পয়ান করি
তবু সহি কত উৎপীড়ন ।
হিরণ্যকশিপু শূর কেড়ে নিল স্বর্গপুর
ব্রহ্মা-বরে হ'য়ে বলীয়ান

সহিনু যে সব ক্লেশ, দেব নামে জন্মে ঘেঘ

সবিশেষ আছে প্রণিধান ।

না জুড়া'তে দেহ জ্বালা, পরায়ে শৃঙ্খল-মালা

পশু প্রায় নিল গয়া' যবে

ধিক্ সে দেবত্বে ছার ! এরে করে টিটকার

কোটি কল্লের কলঙ্ক রটিবে ।

বৃত্ত শঙ্করের বরে নির্জ্বরে জর্জ্বরে শরে

ফেরু সম করে বিতাড়িত,

হ'য়ে ত্রিদিবের পতি, হরিল পৌলমী সতী

সে ঐন্দ্রিলাপদ-সেবারত ।

কি আছে মা মনে আর বরে বলী বিধাতার

দুরাচার দুর্ব্বার রাবণ,

বেঁধেছে দাসত্ব-পাশে মরতে মনুজ হাসে

নিত্য সেবি ভূত্যের মতন ।

আমি ইন্দ্র মালাকার, বিরচি মন্দার-হার

আনন্দে'সে সাজায় গলায়

অশন-সময়ে তার বরষি বারিদ-ধার

যাতে প্রভু হৃদে তুষ্টি পায়,

মৃত্যুপতি অশ্বশালে সত্রাসে সে পশুপালে

ছায়া-সুত রজকের কাজে

পবন ব্যঞ্জন-করে মন্দার-সম্পদ হ'রে

তোষিবারে রক্ষ মহারাজে ।

কিকব দুর্ভাগ্য কথা, তবু তার মশ্ন-ব্যথা
 চলিলু মা ! পূজিতে চরণ,
 মায়ায় সন্ধান জানি ঘেরে রক্ষ-অনিকিনী,
 মৃত-বৎ রেখেছে জীবন ।
 এত বলি সুরপতি' নমি হৈমবতী সতী
 বিমুক্তিলা অঙ্গের সুবাস ।
 হেরিয়া শোণিতাপ্লুত সর্বাস্ত্রে সায়ক-ক্ষত
 জগন্মাতা ছাড়িলা নিশ্বাস ।
 ভকত দুর্দশা হেরি ঝরিল নয়ন-বারি
 ক্রোড়ে করি করিল সাস্তুন ।
 ভব-রাণী অক্ষ-স্পর্শে দুঃখ ত্যজি ভাসে হর্ষে
 মাতৃ-অঙ্কে বালক যেমন ।

বিষাদে বিষগ্নমতি, কহিলা পার্শ্ববতী
 'করমের লীলাভূমি এতব ভবন
 কেপারে রোধিতে বল প্রাক্তনের গতি ?
 অলঙ্ঘ্য অটল ভালে বিধির লিখন !
 কঠোর তপের বলে দুর্জয় রাবণ
 যাবৎ সুফল ভোগ নাহি হয় ক্ষয়
 বিধি, বিষ্ণু, হর নারে করিতে নিধন
 আগত সংহার কাল, জানিবে নিশ্চয় ।'
 উত্তরিল শচী-কান্ত "নিয়তি রূপিণি
 এতব ছলনা ; কিবা অনায়ত্ন তব ?

বিরিকি-উপেন্দ্র-চন্দ্র-চূড়-প্রসবিনি
 অগুরুপে এতক্ষণ যাহাতে উদ্ভব !
 প্রবৃত্তি রূপিনী পাপ-পুণ্য প্রদায়িনী
 সুখ-দুঃখ দয়া-কোপ-চক্র-আবর্তন
 তোমার ছলনে ভুলি না-চিনি জননী
 ইচ্ছাময়ী ইচ্ছা সর্ব কল্মষের কারণ ।
 ত্রিদিব-পালন-ভার শিরে সমর্পণে
 ডুবা'লে স্বার্থের ঘোর মোহময় কূপে
 জ্ঞান-যোগ বিনে হেন গৃঢ় আবরণে
 উদয়াটিতে স্বার্থ-দাস সমর্থ কিরূপে ?
 অসমর্থ স্বর্গপুর করিতে রক্ষণ
 তরণী বরিত কালি সম্মুখ সংগ্রামে
 ত্রিভুবন জয়ী বিযুৎ-ভকতি-কারণ
 শ্রীরাম আসক্ত চির প্রিয় ভক্ত-নামে ।
 তরণী অবধ্য যদি রাঘব-সমরে
 রাবণের অন্তঃকাল না হবে উদয়
 দাসত্ব-শৃঙ্খলাবদ্ধ রহিবে অমরে
 অনন্ত কালের তরে জানিনু নিশ্চয় ।
 ব্রহ্মার-আদেশবাণী দৈব-বাণী রূপে
 বিজ্ঞাপিল ভয়াবহ ভীষণ বারতা
 শ্রবণে কম্পিত-প্রাণ রক্ষিবে কিরূপে
 পদাশ্রিত দেবগণে কহ জগন্মাতা ?


যে মহা মায়ায় মুগ্ধ অখিল সংসার
 সে করুণা-কণা মাত্র হলে বিতরণ
 অনায়াসে হ'তে পারে তরণী-সংহার
 স্বগুণে রাক্ষস-ভীতি কর নিবারণ ।
 তরণী আগত হলে সম্মুখ সমরে
 বিষ্ণু-দেব জন্মাইবে অন্তরে তাহার
 নহে কি পাইবে ত্রাণ অমর নিকরে ?
 বৈদেহী যাতনা মাগো না ঘুচিবে আর ?
 নতুবা শ্রীপদ-দাস ক'রে চিরদিন
 এ অধম সন্তানের কাটি স্বার্থ-পাশ !
 ত্রিলোক-তারিণী-গুণে মোহ ক'রে লীন
 হৃদয়ে সঞ্চাল জ্ঞান-সুধা সুবাতাস ।
 বাসবের মিষ্টভাবে তুষ্টা হৈমবতী
 করিলা স্বীকার, সুর—মঙ্গল-সাধনে
 ধূর্জটি হইলা অতি বিষাদিত মতি
 ভাবিলা মজিল লক্ষা আহা ! এতদিনে !
 মনোময়ী মনে উহা জানিয়া তখন
 কহিলা শঙ্করে, “হের হের মহেশ্বর
 কর্বুর দৌরাণ্ড্যে অঙ্গে লোহ-প্রস্রবণ
 মৃত প্রায় সমাগত অমর নিকর !
 এতস্তুতি করে তোমা সহস্র-লোচন
 তবু তুমি উদাসীন, ইষ্ট-চিন্তারত,

সমভাবে তপ-মগ্ন দেব পঞ্চানন
কিরূপে সাধিবে অশ্রু কার্য্য সুবিহিত ?
সদাকাল চিন্তা সুধু রাবণের হিত
যে করে অমরে রত কিস্করের ত্রিতে
দেব দেব নামে তুমি করিলে অঙ্কিত
অসীম কলঙ্ক-রেখা, ধিক্ বিশ্বপতে !
তবসঙ্গে দ্বন্দ্ব-রঙ্গ লিপি বিধাতার ।
তুমি যদি বিশ্বেশ্বর ত্রিলোক-তারণ
সর্ববজীবে সমভাবে মমতা-বিস্তার—
বিলক্ষণ, এনাম সুধু চাটুর বচন !
কহিতে দহিছে অঙ্গ,—যদি কাশীধাম
মরে কোন মহাপাপী নারকী কুজন
মৃত্যু-কালে কর্ণে দিয়া দিব্য রাম-নাম
নিজগুণে মোক্ষ-পদ করহ প্রদান—
স্থানান্তরে অন্ত্যকালে কফ-রূপে বসি
জ্ঞান-অঙ্ক ক'রে তারে প্রদান যন্ত্রণা
ভুলাইয়ে ইন্দ্ৰচিন্তা কণ্ঠে দেও ফাঁসি
কেন তোমা বিশ্বেশ্বর করিব বর্ণনা ?
গঙ্গাধর যোগ্য নাম, ওহে বিশ্বপতি
বল দেখি কোন্ পাপে পাপী দেবগণ ?
বৈদেহীর কোন্ পাপে বল লঙ্কাপতি
অশোক-কাননে করে হেন নির্গাতন ?

প্রচেতার কোন্ পাপে নিগড় বন্ধন
 শ্রীরাম কানন-বাসী,—বালীর নিপাত
 পর উপকার-ব্রতে জটায়ু-নিধন
 হিতভাবে বিভীষণ পায় পদাঘাত ?
 যদি তুমি এর নাহি কর প্রতিকার
 পাপীর উপরে যদি এহেন সদয়
 রটাইব ঘরে ঘরে কেউ যেন আর
 না ডাকে বিপদে ব'লে জয় মৃত্যুঞ্জয় !
 উমার এ তীব্রবাণী কৃশানু যেমন—
 দহিল শঙ্করে ক্রোধে কাঁপিল শরীর
 জ্বলিল ললাট-বহ্নি ভীষণ দর্শন
 গরজিলা জহু-সুতা জটাতে গভীর !
 রৌদ্রভাবে রুদ্রদেবে সচেতন হেরি
 থরথরি মহাত্রাসে কাঁপে বৈকর্ত্তণ
 নিরখি সংহার মূর্ত্তি শূলী ত্রিপুরারি
 পড়িল সে পদে নমি সুপর্ব্বান গগ ।
 মদন-দহন-বার্ত্তা উদিল স্মরণে—
 চিস্তিয়া সহসা ভক্তাধীনা হৈমবতী
 অভয়-ভাষণে তুষি ভীত দেব গণে
 সহসা ধরিল সূক্ষ্ম মোহিনী মূরতি ।
 যে মহাশক্তির বশে মোহিত সংসার
 সে শক্তি প্রবেশ মাত্র শঙ্কর অন্তরে

অন্তরিত ভীম ভাব, কি লীলা মায়া
 ধরিল। প্রশান্ত ছবি প্রমথ অচিরে !
 শক্তির মহিমা হেরি যুক্তযুগ কর
 পড়িল। সে পদে নমি স্তম্ভনসগণ
 করিল। অশেষ স্তুতি দেবপুন্দর
 সন্তোষিতে শিব-দাতা শিব ত্রিলোচন !
 বাস্পাকুল সুরবন্দ নিস্পন্দ ধমনী
 নাসিকা নিশ্বাস হীন মুদিত নয়ন
 বাসবে রোমাঞ্চ তনু হেরি শূলপাণি
 অভয়-অমিয়-বাণী করিল। বর্ষণ—
 “যাও ইন্দ্র নিজধামে দুর্গতি যুচিল
 ভক্ত-চূড়ামণি মম নিকষা-নন্দন
 পূজে এতকাল মোরে আহা এই হ’ল
 বিপদে অন্তিমে তারে করিনু বর্জজন !
 দহে মন, রক্ষনাথে বিধাতা বিমুখ
 নন্দীর সে মহাশাপ ফলে কস্মিন্ফলে
 অচিরে যুচিবে সর্ব বিবুধের দুঃখ
 কস্মিন্ফলে জীব মাত্র মৃত্যু-পথে চলে ।
 তপস্বিনী বেদবতী প্রতি পাগাচার
 দিল। শাপ সীতারূপে জন্মিয়ে ধরায়
 রাবণ বধের হেতু হবে লঙ্কাপুরে
 সেদিন আগত এবে কহিনু তোমায় ।

ইক্ষাকু বংশীয় অনরণ্য মহীপাল
 রাবণ-সমরে ঘোর হইয়ে লাজ্জিত,
 শাপিলা এবংশধর জন্মিবে ভূপাল
 যার করে রক্ষ-কুল হবে নিশ্চলিত ।
 ইন্দু-জ্যোতি রস্তাবতী-সতীত্ব বিনাশে
 দিলা শাপ তার পতি হয়ে কোপবান
 সতী-প্রতি পাপ-মতি স্ববল-প্রকাশে
 আয়ু-সূর্য্য রাবণের হবে তিরোধান ।
 চতুর্ষয় শাপ-বহ্নি হ'য়ে সন্মিলিত
 দহিবে রাবণে তার কস্ম-অনুযায়ী
 স্বকর্মের ফল-ভোগ কে করে খণ্ডিত
 অচিরে কর্বুর-কুল হবে ধরাশায়ী ।
 মহেশ-আদেশ-বাণী করিয়া শ্রবণ
 মহানন্দে ইন্দ্র করে শিবজয় ধ্বনি
 আচম্বিতে সমাগত অপূর্ব্ব দর্শন
 জগত-মোহিনী মায়া স্তুদিব্য রমণী ।
 ভবেশ আদেশে তায়, রহ অনুক্ষণ
 সুরেন্দ্রের হিতকর কার্য্য সম্পাদনে ।
 মৃত্যুঞ্জয় প্রদানিলা পিণাক ভীষণ
 শৈলজা করিলা বলি শক্তি সঞ্চারণে
 ভক্তি ভাবে আখণ্ডল বন্দি হৈমবতী
 করি নতি শিব পদে মায়ার সহিত
 স্তুদিব্য স্তন্দনে চাপি করিলেন গতি
 প্রীতি-নোরে সুরবৃন্দ হয়ে নিমজ্জিত ।



চতুর্থ-স্বর্গ।

বধূ সাজে বিভাবরী
 দীপ-চন্দ্র-হার পরি
 ইন্দুর সিন্দূর-বিন্দু ভালে সুবিমল,
 সুবাস-আতর অঙ্গে
 সমীর ছড়ায় রঙ্গে
 কোকিলা প্রেমদা প্রায় গায় সুমঙ্গল !

যেন বধূ আগমনে
 প্রীতি-মাথা ফুল্লমনে
 পাপিয়ার হলু ধ্বনি ধ্বনিল গগনে,
 প্রকৃতি এয়ের সাজে
 কুসুম-ভূষণে-সাজে
 অলি যুক্ত লাজ-মাথা আনত বদনে ।
 সুনীল গগন যেন
 চারু চন্দ্রাতপ হেন
 ঝালরে শুকুতা-মালা তারকার হার !

নহবত পাখী-স্বরে
 দিগন্ত ধ্বনিত করে
 বিটপি কুসুম দামে অর্পে প্রীতিহার
 নীহার-মুকুতা চয়
 নব বালা কিশলয়
 শ্যামল বসন-প্রান্তে করে বলমল
 বিধু-কর-সিধু-পানে
 প্রমোদে আকূলপ্রাণে
 বর-পক্ষ উপনীত চকোরের দল ।

নীল-নীরে সোধমালা
 লইয়া সুষমা ডালা
 নাচিয়া তরঙ্গ-বক্ষে করিছে বর্ণন
 বীরত্ব-মূরতি আঁকা
 বিমল মাধুরী-মাথা
 যশঃ-কিরীটিনী-লঙ্কা রক্ষ-নিকেতন ।

খুলিয়া গবাক্ষ-আঁখি
 নিরখি সহস্র-আঁখি
 জম্বুকের প্রায় করে রণে পলায়ন ।
 বিদ্রুপ হাসির ছলে
 অসংখ্য অলোক জ্বলে
 পশিলে অমর-বৃন্দ কৈলাস ভবন ।

জয়ধ্বনি সিংহনাদ সদন্ত হুঙ্কার
করিরক্ষ রথীগণ
কোদণ্ডে ভীষণ স্বন
ফিরিল কর্ণবুর বৃন্দ কাতারে কাতার ।

মন্দার কুসুম-মাল্যে রম্য হৈল যত,
সুসজ্জিত, হরে চিত্ত
হেম কুন্ত অগণিত
পূর্ণিত পল্লবান্বিত দ্বারে সংস্থাপিত ।

স্বর্ণে মণ্ডিত দিব্য বিজয় কেতন,
রিপু-গর্ভে খর্ব্ব ক'রে
উড়িল প্রাসাদোপরে
বিজ্ঞাপিতে রক্ষ-কুল-বীরত্ব ভীষণ ।

হীরক, মুকুতা, মণি খচিতাভরণে
ক'রে, চারু অঙ্গ-শোভা
অনঙ্গের মনোলোভা
রক্ষাঙ্গনা বিরচিলা আপন চরণে ।

কুসুমে কপোল চারু ক'রে সুরঞ্জিত
নিরখিলা দরপণে
অঞ্জনের সন্মিলনে
নয়নে কুসুম-শর-চাপ-সংস্থাপিত ।

স্বষমা-গরবে মনে গর্ব অতিশয়
 মরাল-গমনে চলে
 মেখলা নিতম্বে খেলে
 পতির কৃতিত্বে আরো উৎফুল্ল হৃদয় ।

বিমুক্ত অলঙ্-গুচ্ছ আলিত চরণ
 পীনোন্নত পয়োধরা
 যৌবন মাধুরী ভরা
 প্রমোদে প্রেমদা কুল গায় স্তম্ভল ।

মকরান্ধ-শোক যেন এলঙ্কা ছাড়িয়া
 আমোদের উৎপীড়নে
 ক্ষুব্ধ মনে সঙ্গোপনে
 বিধবা রমণী-বক্ষে রহে লুকাইয়া ।

নিশি ভোরে শঙ্খধ্বনি শুনি সভাতলে
 তীক্ষ্ণ তরবারী পাকে
 বিজলী উজলি বাকে
 রঞ্জন সদনে চলে রক্ষরথী দলে ।

সগর্বিবত পদক্ষেপে কম্পিতা ধরণী
 বিচিত্র বসন অঙ্গে
 কিরীট-হীরক রঙ্গে
 রবি-করে খেলে যেন স্থিরা সৌদামিনী

শৈলেন্দ্র-সমাজে যথা হিম-নিকেতন
বসেছে রাক্ষস-রবি
ধরিয়া প্রচণ্ড ছবি
চৌদিক করিছে আলো পাত্র মিত্রগণ ।

ডুবালু প্রবাল-লুক্ক সুনীল জীবনে
নক্সের কবল-ভীত
তেমতি ত্রাসিত চিত
রয়েছে সুরথীবৃন্দ নৃপতি-সদনে ।

ছত্রধর ধরে ছত্র সূচাকু চিত্রিত
উলঙ্গ কৃপাণ করে
নয়নে কৃশাণু ক্ষরে
দ্বারে ভীম দ্বারপাল কৃতান্ত কিস্কর,
কতক্ষণে রক্ষ-হরি কহিলা গরবে
অমর বিক্রম যত
আজি সবে দেখিলেত ?
হরি-ভাত ফেরে যেন রাক্ষস-আহবে ।

একুতিয় নিয়ে রটে “ত্রিদশ-ঈশ্বর”
অব্যর্থ অশনি-পাণি
বৃত্ত যিনি অভিমানী
সমরে কম্পিত প্রাণ যেমন তস্কর ।

অব্র-ভেদি শৃঙ্গ ভাঙ্গে যে পবন বলে
 প্রবল প্রতিভা-শশী
 কলঙ্কে করিল মসী
 ডুবাইল কীর্তি-রত্নজলধির জলে ।

শতোধিক ফালানল-পূর্ণ-দণ্ড-ধর !
 শিশু মাতৃ অঙ্কস্থিত
 তারে ক'রে কবলিতে
 অব্যর্থ দণ্ডের প্রভা বিস্তারে বর্বর ।

পাষণ্ড ষণ্ডের প্রায় কে আর এমন ?
 সতীর হৃদয়-নিধি
 কেড়ে নিয়ে নিরবধি
 হৃদয়ে জ্বালায় তীব্র শোক-হতাশন ।

অমূল্য কোমল মনে শ্মশানের ছায়া
 অগ্নান প্রসূন প্রায়
 অকালে শুকায়ে যায়
 হেরি সমুৎফুল্ল-মতি সে নরক-কায়া ।

যেমন পাষণ্ডতার দুর্দশা তেমন
 কাঁপে যেন রস্তাপর্ণ
 কোপে যবে ধরি কর্ণ
 বিবর্ণ এ পদাঘাতে বিগত চেতন ।

অনন্তর স্থানান্তর বিহঙ্গম রূপে

পুনঃ পেলে সে পামরে

নরকের কারাগারে

রাখিব অনন্ত কাল পূরি তমঃ-কূপে ।

পাপী-ত্রাণ চির পন্থা করি আবিষ্কার !

কৈলাস-প্রবেশতরে

স্বসেতু নির্মাণ ক'রে

বিমুক্ত শমনাতঙ্ক করিব সংসার !

নাক-গর্ব্ব খর্ব্বকারী পিণাকী-দর্শনে

মরতে ঘটিবে নাক

ছেদিব নাকের নাক

হবে নাক-নাক-জাক বিলীন গগনে ।

রহিবে অতুল কীর্ত্তি অবনী-মণ্ডলে

রটিবে মানব, নারী

রক্ষেন্দ্র কেমন বৈরী

সধিকারে চিরকাল দেব আখণ্ডে ।

“ভুবন ব্যাপিত তব যশের কানন”

উত্তরিল মেঘনাদ

রক্ষসনে দেব-বাদ

বামনের সাধ যথা চন্দ্রমা-গ্রহণ ।

স্মর-নির্যাতন ব্রতে ব্রতী চির দিন
 দেবের দেবত্ব-শশী
 ক্রমশঃ হইল মসী
 একাৰ্য্যে নির্জর হবে চির বীৰ্য্য হীন ।

মশক-দলনেক্ত লভিবে পৌরষ ?
 অর্পিবে শ্রবণে কর
 সংসারের নারীনর
 অবলা-পীড়নে থাকে রথীর কি যশঃ ?

ভীত-প্রতিশোধে হবে অকৃতিভাজন
 অরি যে মনুজ দ্বয়
 অচিরে করহ ক্ষয়
 রাঘব শোণিতে তৃপ্ত করহ জীবন ।

অনুজ-নিহস্তা নহে আজি অন্ত-প্রাণ
 বানরে বিজয় গায়
 সে দুঃখে দহিছে কায়
 কর তার সংহারের উপায়-বিধান ।

“হিত ভাষে সন্তোষিলে” কহিলা রাবণ
 এ যুক্তি অমিয়-মাথা
 বীরত্ব মাধুরী আঁকা
 যোগ্যতম বাক্য তব কৃতিত্ব মেমন ।

চলিগু কৃতান্ত সম এবে এ সমরে

সাজ সাজ রথীগণ

কাঁপাও এ ত্রিভুবন

অর্পণ করিব নরে রণ-বৈশ্বানরে ।

এতবলি রক্ষরাজ করে আশ্ফালন

ভীষণ-বীরত্ব দাপে

সঘনে অবনীকাঁপে ।

সদর্পে কহিলা তবে সরমা-নন্দন ।

নাহি কি লক্ষায় বীর যাইতে আহবে ?

কেন হেন হীন কাজে

যেতে দিবে মহারাজে ?

কেন রক্ষ-রথী বৃন্দ তোমরা নীরবে ?

নর-পশু-বধে যদি এত আড়ম্বর

কেন রক্ষ-বাসে লক্ষা

দেব-দানবাদি-শঙ্কা

বীরত্ব-সুযশঃ-ডঙ্কা নাদে দিগন্তর ।

কোদণ্ড টঙ্কারে য়ার ত্রিভুবন টলে

ইন্দ্রজয়ী ইন্দ্রজিত

আছে হেতা উপনীত

বীরবাহু-বাহু-বল ব্যাপ্ত ভূমণ্ডলে ?

কুবের, পবন, যম, দীপ্ত দিবাকর
 প্রচণ্ড বীরত্ব দাঁপে
 সত্রাসে সতত কাঁপে
 নহে অন্ত-প্রাণ সেই তরণী-কিঙ্কর ?

জীবিতে যতপি যায় বংশের সম্মান
 বহিয়া কলঙ্ক-ডালি
 গৌরব করিয়া কালী
 ধিক্ তার এ জীবনে মঙ্গল মরণ !

এখনও রক্ষ রথী তোমার নীরবে !
 রাঘব অক্ষত কায়
 বানরে বিজয় গায়
 কেমনে সহিছ হেন অপমান সবে ?

পরাজুখ সবে যদি লভহ বিরাম
 একা দলি অরি-পক্ষ
 যোদ্ধৃগণ লক্ষ লক্ষ
 লঙ্কেশ-অনুজ-সুত রক্ষিব এনাম ।

না চাহি গজেন্দ্র, বাজি স্যন্দন সারথা
 অশ্মারোহী পদাতিক
 হীন রণে সে অলিক
 ভীমগদাঘাতে হত হবে দাশরথী ।

অথবা সে গদা অস্ত্রে কিবা প্রয়োজন

বাহুবলে উপারিয়া

শত গিরি একত্রিয়া

চাপিয়া মারিব যত অরাতি দুর্জ্জন ।

থাকিতে লঙ্কায় এক রাক্ষস-কিঙ্কর

স্বমানে হানিয়া বাজে

মহাযশাঃ রক্ষরাজে

না দিব বধিতে যেতে মানব-বানর ।

তরণীর বীরদাপ দীপ্ত হতাশন

সন্মুখে চুম্বিয়া শির

ইন্দ্রজিত মহাবীর

ধন্য ধন্য বলি প্রেমে করে আলিঙ্গন ।

এক বাক্যে প্রশংসিল অমাতা-মণ্ডলী

স্নেহ-নীড়ে পূর্ণ আঁখি

আদরে জীবন-পাখী

বক্ষে নিলা রক্ষ-রাজ হয়ে কুতূহলী ।

ধরিল বিচিত্র শোভা নয়ন-রঞ্জন

বসন্তে শ্যামল সঁজে

যেমতি সুষমা রাজে

ভুবন ভুলান পূর্ণ চাঁদের কিরণ ।

সন্নেহে রোমাঞ্চ তনু কহে লঙ্কেশ্বর,
 যত পুত্র-শোকানল
 তোর ভাষে হল জল
 জানি তুই রক্ষকুলে বীরত্ব-ভাস্কর
 জুড়ালে তাপিত প্রাণ প্রাণ-প্রিয়তম,
 তোর বীর্য্য বল কথা
 সুর-হৃদে চির গাঁথা
 তবু প্রাণ কাঁপে বাছা হইয়ে নিশ্চয়ম—
 কেমনে পাঠাব কাল সমর-প্রাঙ্গনে ।
 বিধাতা হয়েছে বাম
 শোকে জ্বলি অবিরাম
 আঁধার ঘরের আলো কাঙ্গালের ধনে ।
 বধু সরমার তুমি নয়নের মণি
 প্রাণাধিকা ইন্দুমতী
 কামিনী কুলের ভাতি
 বিধি-চক্রে কাঁপে প্রাণ, দিবস রজনী ।
 নিষ্ঠুর জনক তব ত্যজি দয়িতায়
 সোণার প্রতিমা যেন
 পুত্রবধু,—পুত্র হেন
 জ্ঞাতি, বন্ধু, কুলমান, সোদর ভ্রাতায়,

দিয়ে জ্বলাঞ্জলি সবে নর-পদ-তলে
বিক্রীত করেছে কায়
শুনে বুক ফেটে যায়
ভাসা'লে সরমা বধু বিষাদের জলে ।

শরদিন্দু সম দীপ্ত কর্ণবুর-শ্রিমা
হায় সে আপন করে
অপিল কেমন ক'রে
স্বণিত দাসত্ব-রূপ কলঙ্ক-কালিমা ।

দেহান্তরে হেন দুঃখ রহিবে অন্তরে
তৃণ হেন যারে গণি
তারে পূজে “নরমণি”
রক্ষেশ-অনুজ-ভুজ নর-সেবা করে ।

কুক্ষণে জন্মিল সূৰ্পণখা অভাগিনী,
পঞ্চবটি বনান্তরে
ছিন্ননাসা ই'লে পরে
কহিল বিষাদ-বার্তা যবে বিষাদিনী ।

শ্রবণে জ্বলিল দেহ অপমানানলে,
তাই যোগী-বেশ ধরি
জানকী আনিবু হরি
উপযুক্ত প্রতিশোধ দর্শা'তে ভুতলে ।

আহরণ না করিলে রাঘব-রমণী
 দিকারি বিজ্ঞপ ক'রে
 হাসিত অমর নরে
 দিগন্ত ব্যাপিত মম ভীরুত্বের ধ্বনি ।

পদে দলি-বংশ-মান, ত্রায়েব বিচার
 বৃথা অনুরোধ করে
 কি দোষে অরাতি-করে
 করিল অঙ্গার সম সোণার সংসার ।

এতবলি রক্ষ-রাজ কাঁদিল নীরবে
 স্মরিয়া অনুজ, স্মৃত
 রথী যত রণে হত
 একে একে মহাযশা শোকোচ্ছ্বাসে সবে

নৈকষেয় অশ্রু-জল করি সন্দর্শন
 করি যুক্ত যুগকর
 রক্ষ-কুল-প্রভাকর
 তরণী কহিল তাত শাস্ত কর মন ।

সীতা-আহরণ তব ত্রায্য কার্য্য বটে
 মানীর মর্যাদা- যত
 মানহীনে জানে কত ?
 নিস্তেজ সে কাপুরুষ “হরণ” যে রটে ।

যার করে পিতৃ-স্বসা হল হত মানী
 সুরাসুর, বিছাধর,
 দানব, গন্ধর্ব্ব, নর
 কার সাধ্য সে পুরুষ রক্ষিবে কামিনী ?

তেজহীন বীৰ্য্যহীন জীবন যাপন
 তার চেয়ে শতগুণে
 গলে বাঁধি কুস্ত-গুণে
 নীলাম্বর অশ্রুতলে মঙ্গল মরণ ।

বীরের সম্মান মোরা বীর অবতার
 থাকিতে দেহেতে প্রাণ
 কেন সব অপমান
 থাকিতে ধমনী-রক্ত করে তরবার ?

পাবেনা সে কাপুরুষ জানকী স্পর্শিতে
 যত্নপি সে যুক্ত করে
 ক্ষমা ভিক্ষা নাহি করে
 থাকিতে শোণিতবিন্দু রক্ষধমনীতে ।

লুকাই রাঘব যদি জলধির নীরে
 ধরিয়া কুস্তীর কায়
 গ্রাসিব কবলে তায়
 সিংহ-রূপে বিনাশিব পেলৈ শৈল-শিরে ।

স্বর্গে যদি পশে দুষ্কৃত অমর-আশ্রয়ে
 উপারিয়া বাহুবলে
 বৈজয়ন্তী চাপি জলে
 পাঠাব সুরেন্দ্র সহ শমন-আলয়ে ।

পাতালে পশিলে সেই মানব দুর্ব্বার
 নরসিংহ-মূর্ত্তি ধরি
 বজ্রনখে ছিন্ন করি
 সূৰ্পগথা-প্রতিশোধ দর্শাব এবার ।

জলদে প্রবেশে যদি মানব দুর্জ্জন
 গদাঘাতে ভয়ঙ্কর
 বিচূর্ণি নীরদ-স্তর
 অশনি-অনলে তারে করিব দাহন ।

অরণ্যে পশিলে রাম তীব্র শরানলে
 তৃণ যথা দাবানলে
 ভস্মিব সদল বলে
 প্রতিজ্ঞা আমার তাত, রক্ষ-সভাস্থলে ।

হরি যথা করী-শিশু করে বিদীরণ,
 হেলায় বিনাশি অরি
 যশঃ-মাল্য গলে পরি
 নমিব, নতুবা নাহি দেখাব বদন ।

তোমার প্রসাদে তাত করি দিখিজয়,

সানন্দে আশীষ দাসে

যেন যশঃ-ইন্দু হাসে

সুনীল ভারতাকাশে সদা হাস্তময় ।

রক্ষিয়ে তোমার গর্বব ফিরিব সহর

দর্শাব জগত মাঝে

যে যবে সমরে সাজে

এ লক্ষা-প্রসূত যত মহা ধমুর্দ্ধর ।

রাঘব কৃতিত্বে রক্ষ কিবা উপকার ?

প্রতিদ্বন্দী প্রশংসায়

স্বকুল গৌরব ধায়

সংগ্রামে না উপরোধ মানিব পিতার ।

তরণী সুষুপ্তি উক্তি করিয়া শ্রবণ,

প্রমীল্যুর-মনোহর

স্বমুকুটে বীরবর

সাজাইলা প্রীতি-অশ্রু করি বিসর্জন !

আলিঙ্গনে তোষি অঙ্কে রাখে লঙ্কেশ্বর

সভ্যবৃন্দ একতানে

প্রশংসে পুলক প্রাণে

বিমানৈ কল্পিত-প্রাণ অমর নিকর ।

রাজ-অনুমতি মতে রক্ষ-রথী-গণে

জাহ্নবীর পুত নীরে

সুবর্ণ ভূঙ্গারে ধীরে

অভিসিক্ত করিলেন সরমা-নন্দনে ।

ভীমনাদে রক্ষ-সৈন্য করে আশ্ফালন

চৌদিকে দুন্দুভি বাজে

কাঁপাইয়া দেবরাজে

প্রমাদ গণিল যত বিশ্ব-জীব-গণ ।

স্বর্ণ লক্ষা প্রকম্পিত কর্বুর-প্রতাপে

মেঘনাদ-জয়নাদে

কাঁপাইলা মেঘ-নাদে

কোদণ্ড নির্ঘোষে ত্রাসে মেরুশীর্ষ কাঁপে ।

কুঞ্জর, সুন্দর বাজি, শুন্দন সজ্জিত

তূণ, ধনু, অসি, চন্দ্র

শিরস্ত্রাণ, বাণ, বন্দ্য

পুঞ্জ পুঞ্জ তুঞ্জাকার হল সংগৃহীত ।

জানিয়ে প্রলয় কাল কাঁপিল মেদিনী

সশঙ্কে লঙ্কেশাতঙ্কে

ত্যজিয়া দিবার অঙ্কে

ডুবিল পশ্চিমাচলে ভয়ে দিনমণি ।

হেন কালে শঙ্খধ্বনি হল ঘোরতর
গৌরবে পূর্ণিত কায়
ধরা হেরি সরা প্রায়
সভা ভঙ্গে চলে যত রাক্ষস-নিকর





পঞ্চম-সর্গ ।

পশ্চিম গগনে ভানু রক্তিম ছটায়
স্বরঞ্জিত মেঘ-মালা করিলা যখন
দিবা-সতী প্রাণ পতি বিচ্ছেদ-শঙ্কায়
চিস্তায় মলিনা মূর্তি করিলা ধারণ ।
দিনমণি-শোকে দিবা সমুপ্ত অন্তরে
পতি সহ অনুমৃতা হইবার আশে
জ্বলিছে যেনরে চিতা পশ্চিম অশ্বরে
কলকণ্ঠে বিহঙ্গম সে শোক প্রকাশে !
ক্ষীণ-প্রভ প্রভাকর নিরখি নয়নে
দিবা-সখী কমলিনী ঢাকিল বদন
প্রভাতের ব্যবহারে ঈর্ষাকুল মনে
কৌতুকিনী কুমুদিনী সহাস্র আনন ।
শ্রম-শ্রান্ত ক্লান্ত-কায় শান্তি-পূর্ণ মন
গ্রাম্য-গীতি অনুরক্ত কাম্য গেহ-পানে
হলস্কন্ধে কৃষকেরা করিছে গমন
নাচিছে গোবৎস সঙ্গে রঙ্গ-পূর্ণ প্রাণে ।

গোধূলির অঙ্গরাগে গোধূলি রঞ্জিতা
 তারা-হার গলে ভালে চন্দ্রমা-ভূষণ
 তমসা-ধূসর-বাস দিব্য পরিহিতা
 কুসুম-ভূষণে সাজে মানস-মোহন
 দেবালয়ে শঙ্খ, ঘণ্টা, কংকণ, করতাল
 মধুর মৃদঙ্গ বাজে আরতি উৎসবে
 বিভূর মহিমা গানে হয়ে স্মিংশাল
 সায়ন্তন কৃত্যে রত দ্বিজগণ সবে ।
 উদ্ভাসিত চন্দ্রমার স্তম্ভিষ্ঠ কিরণে
 তরণীর প্রিয়তম প্রমোদ উদ্ভান
 বামাকণ্ঠে পূর্ববীর সঙ্গীতালাপনে
 সুধা-কণ্ঠী ইন্দুমতী বিমোহিছে প্রাণ ।
 বাসিত কুসুমকুল করিয়া চয়ন
 বিচরিছে প্রমোদিনী সরস অন্তর
 বিমুক্ত অলকাগুচ্ছ দোলায়ে পবন
 কভু আবরিছে চারু মুখ-শশধর !
 কভুবা গোলাপ শাখে জড়ায়ে বসন
 রসিক পবন কত করে রস-কেলী
 উন্মুচিতে কম করে করিলে ধারণ
 মারুত-সোহাগে শাখা পড়ে হেলি চলি ।
 বিনাস্তে গাঁথি হার অমলা সঙ্গিনী
 সাজায় মোহিনী বেশে রমণী রতন

দেবধাম পরিহরি ত্রিদিব-কামিনী
 সৌন্দর্য্য স্বমূর্ত্তি হেন করিল ধারণ ।
 সাক্ষ্য-সখী রাখি দূরে রজনী সুন্দরী
 অলক্ষ্যে পশিল যেন উদ্যান-অন্তর
 অতুল সুসমা ঘেরি আপনা পাসরি
 কোকিলা করিল গানে আকুল অন্তর
 সুধাংশুর অংশুমাল মাখিয়া যতনে
 নিরখি স্বঅঙ্গ-আভা পাপিয়া মাতিল
 সুরবে অমিয় ঢালি মাতা'য়ে গগনে
 শাখী পরে সুখ সারি অমৃত বর্ষিল
 সহচর-মুখে শুনি প্রীতি-সস্তাষণ
 প্রমোদিত মনে মধু পশিল উদ্যানে
 রণ-বাদ্য-রবে মত্ত যথা বীর-মন ;
 মীন-কেতু সমাগত বসন্ত-আহ্বানে ।
 সখী সনে লতা কুঞ্জে চারু শীলাতলে
 বসি হার গাঁথে ইন্দু সোহাগে গলিয়া
 মন-আশা চারু হার দোলাইলে গলে
 প্রীতির তরঙ্গ তাঁর উঠিবে নাচিয়া ।
 হেন কালে ফুল-ধনু-সায়ক-সঙ্কানে
 যুবতী কাতরা অতি পতির বিরহে
 অশ্রু-আখি বিধুমুখি ভ্রমে পুষ্পবনে
 প্রমোদিনী উন্মাদিনী অনঙ্গ-প্রদাহে

ব্যাকুলা কহিলা সখি প্রমোদ কানন
 ছতাশন হেন কেন দহে সীমন্তিনী
 গ্রাসিতে উদিল যেন রোহিণী-রঞ্জন
 কাল ভুজঙ্গিনী সম একাল যামিনী ।
 রাজিল নয়ন-প্রাস্তে অশ্রু-বিন্দু যবে
 নীহার-মুকুতা যেন পঙ্কজের দলে
 অমলা কহিলা ব্যঙ্গ-বীণার আরাবে
 অলি কি ভুলিবে সখি ফুটন্ত কমলে ?
 বিশ্ব-বিমোহিনি,—তব রূপের কিরণ
 অবলার প্রাণ, মন করে সমাকুল
 কতক্ষণ রবে আর যুবকরতন
 অদর্শনে শাস্ত মনে কেন চিন্তাকুল ?
 বিচর লাবণ্যময়ি !—পুলকে উছানে
 কেন ভ্রাস্ত প্রাণ-কান্ত আসিবে এখনি
 তোষিবে তৃষিত চিত প্রেম আলিঙ্গনে
 চুশ্বি অরবিন্দোপমী ও বদন খানি ।
 অদূরে পিধানে ধ্বনে কৃপাণের ধ্বনি
 শুনি চমকিত অতি অমলার মন
 অঙ্গুলি সঙ্কেতে সতী জানায় তখন
 “পতি সমাগত,—কর প্রীতি-সম্ভাষণ” ।
 ভাঙ্গিল স্রুষ্টি যেন,—চকিত নয়ন
 অন্তর আনন্দ-সিদ্ধু করিয়া মথিত

সরল কটাক্ষ করে অমিয় বর্ষণ
 হইল অপূর্ব ভাবে দেহ কণ্টকিত ।
 নিরখি সে সুধা-দৃষ্টি তরণীর মন
 কাঁদিল হায়রে ভাবি সন্মুখ সমরে
 গত-প্রাণ-শুনি এই অগ্নান প্রসূন
 শুকাবে অমনি তীব্র শোক-রবিকরে
 অধীর হইলা ধীর, নয়ন-আসারে
 আররিল চারুদৃষ্টি, টলিল চরণ
 কাঁপিল হৃদয়াবেগে, যেন হিমাধারে
 কাঁপায় বিশেষ শেষ-শির-প্রকম্পন
 ধনুরে দাম্পত্য-প্রেম ! কি তোর প্রভব !
 বজ্র সম দৃঢ় যেই বীরেন্দ্র হৃদয়
 রমণী-উপম-কম সুবিকাশে তব
 পাশ-বন্ধ সিংহ-সম প্রাণি সমুদয় ।
 ভাবিলা বিষন্ন মনে যুবক তখন
 সরলা অজ্ঞাত তার প্রেম-পরিণাম
 মরু-মৃগ-তৃষ্ণিকায় যথা পান্ডুজন
 প্রপঞ্চে বঞ্চিত ইন্দু,—বিধিতার বাম
 তৃষিত সতীর চিত ধায় পতি-পানে
 যত্নে দমি হৃদ্যবেগ রহে সীমন্তিনী
 অঞ্চলে আবারি ফিরে রক্তিম নয়নে
 প্রণয়ী নীরব হেরি মানে অভিমানী ।

ইন্দুমতী নৌনব্রতী,—নিরখি তখন
 চিস্তিলা অমলা এষে নব অভিনয়
 নহে সমুচিত থাকা এথায় এখন
 সরমে না হবে নব রসের উদয় !
 স্ফুটুরা হেন মনে করিয়া বিচার
 কৌতুক দর্শন-সাধ থাকি অন্তরালে
 কহিলা চলিছু সখি !—বারি আনিবার
 না হবে রচিত হার,—কুসুম শুকা'লে !
 “রজনীতে ফুল শুক” উত্তর বিহনে
 ব্যঙ্গ-বাণ হানি নেত্রে সখী অন্তঃহত
 জারজে অঙ্গজ বলি আদর দর্শনে
 মাতা হাসে যথা জানি পতি প্রভারিত
 হেন কালে কোকিলের পঞ্চম বাঙ্কার
 ভাঙ্গিল সুষুপ্তিঘোর রক্ষ চমকিত
 উপপতি-অঙ্ক-স্থিতা প্রাংশুলা বামার
 পতি-শব্দে আচম্বিতে যথা নিদ্রাগত !
 সিন্ধু-নদ-ধার যথা প্রার্ট-প্লাবনে
 ছুটিলা তরলী যথা সুধার আধার
 অধোমুখি ইন্দুমতী মুখাবগুণ্ঠনে
 ভুজ-পাশে গলদেশ বাঁধে প্রেমদার
 চতুর চঞ্চল দৃষ্টি সুখা-বৃষ্টি করে
 প্রক্ষালিত-মান-মসী করি অবলার

উন্মুক্ত করিয়া রক্ষ বদন-অশ্বরে
 নিরখে শিশির-মুক্ত ছবি চন্দ্রমার ।
 প্রেমোচ্ছ্বাসে সতী-নেত্রে বহে অশ্রুজল
 পতি-আলিঙ্গন-স্রোতে রহিতে না পারে
 যেমতি নীহার-পূর্ণ পঙ্কজের দল
 স্পর্শন-পীড়নাশক্ত বারে দর ধারে ।
 গড়াইয়া গণ্ড-বাহী সে নীর-প্লাবন
 প্লাবিত করিল যবে প্রিয়-বালু দ্বয়
 তরঙ্গী অন্তরে ছোটো শোক-প্রস্রবণ
 বক্ষে নিলা রক্ষ-বলী আকুল হৃদয়
 রক্ষ-ইন্দু-অঙ্কাকাশে ইন্দুর প্রভায়
 ভুবন-রঞ্জন শোভা ধরিল। তেমন
 হিমালয়ে চিত্রার সনে চৈত্র-পূর্ণিমায়
 প্রদীপ্ত শিশির-মুক্ত হিমাংশু যেমন ।
 রসনা অবস ভাষে ভাবাবেশে ভোর
 কম্পিত রোমাঞ্চতনু তোষে প্রেমদায়
 ইন্দু-মুখ-সুধা-মত্ত তরঙ্গী-চকোর
 কপোল-পীড়নে দ্রুত বিরহ পলায়
 স্বকর-কমলে করি চিবুক ধারণ
 কোকিল-কাকলি সম মধু'পম স্বরে
 কহিলা কি হেতু প্রিয়ে ও বিধু-বদন
 বিরত অমৃতময় সুহাস সঞ্চারে ?

কপোল রক্তিম যেন কুঙ্কুম-লেপনে
 সাপিনী-তাপিনী বেণী উন্মুক্ত আকুল
 মানিনী রূপিনী হয়ে পতিত বদনে
 যেন চন্দ্রে আবরিল নীরদের কুল !
 কেন নিমিলিত চারু নলিনী-নয়ন
 রসনা অলস কেন পীযুষ বর্ষণে
 আসার অঞ্জন-রাগ করে প্রক্ষালন
 অন্তর দহিছে কেন দুঃখ-হতাশনে ?
 কি দোষে বধিত প্রিয়ে স্নভুজ-বেষ্টনে
 তরণী হৃদয়ানন্দে, বন্ধ-বিহারিনী
 কেন হেরি চন্দ্রোজ্জ্বল অগ্নান বদনে
 ভীষণ বিষাদ-ছায়া হৃদি-বিদারিনী ।
 লাজ-মাখা অর্দ্ধক্ষুট মধুর বচনে
 পতি-বক্ষে ইন্দুমতী লুকায়ে বদন
 কহিলা—তবু যে মোরে পড়িয়াছে মনে
 বলি হারি !—ভালবাসা পিয়াসী কেমন ?
 সারাদিন অদর্শনে কত আশঙ্কায়
 কাটায়েছি তাজানেন দেব মহেশ্বর
 কিভুলে ভুলিলে নাথ ?—প্রশংসি তোমার
 ক্ষণ অদর্শনে হৃদি কাঁপে থর থর !
 কালরূপী রণক্ষেত্র-ভীমা-কুস্তিরিণী
 বদন বিস্তারি সদা গ্রাসে রক্ষ-মীনে

জানিবে কি ?—সশঙ্কিতা দিবস যামিনী
 কি আছে অবলা গতি প্রিয় পতি বিনে ?
 “বৃথা এ আশঙ্কনা তব” কহিল তরুণী
 সামান্য মানব রাম,—ছার কপিগণ !
 যার বীর দাপে কাঁপে সুর-অনিকিনী
 তার পক্ষে তুচ্ছতম নর-পশু-রণ !
 অচিরে তাড়া’তে চিন্তা সদূর অন্তরে
 সুসজ্জিত রণ-সাজে করিতে সমর
 যশঃ-মাল্য গলে পরি বধি দুর্ঘটনরে
 নিশ্চিন্তে করিব কেলি সরস অন্তর !
 হরষে বিদায় দেও আনন্দ-দায়িনি
 স্বকরে মঙ্গল-কুস্ত করহ স্থাপন
 দেখাও হৃদয়-বল বীরেন্দ্র-রমণি
 কেন হীনা নারী সম করিছ চিন্তন ?
 ভীষণ স্বপন-বার্তা হইলে স্মরণ
 শিহরিলা ত্রাসে সতী পতির বচনে
 শিরে অকস্মাৎ যেন অশনি-পতন
 পড়িলা বিটপি যথা ঝটিকা-তাড়নে !
 পতির পদারবিন্দ হৃদয়ে ধারণ—
 করিয়া কহিলা সতী সক্ররুণভাবে
 যে বচনে হ’ত সদা অমিয় বর্ষণ
 আজি কেন তায় মরি গরল বরষে ?

যতনে পালিত সেই বন-বিহঙ্গিনী
 রাখিতে আদরে সদা হৃদি-পিঞ্জিরায
 তোষিতে সোহাগে কত দিবস যামিনী
 কোন প্রাণে স্বরূপাণে বিনাশিবে তায় ?
 স্বকর-রচিত যেই প্রমোদ উদ্ভান
 বিকসিত ফুল ফুলে হ'লে সুসজ্জিত
 কেবল আপন করে করে উৎপাটন ?
 কি পাষণ প্রাণ তব ?—হইলু বিন্মিত,
 এত যদি ও অন্তরে ছিল প্রাণেশ্বর
 কেন নিরমিলে প্রেম-প্রণয়-প্রতিমা
 নিমজ্জিতে বিচ্ছেদের সাগর-অন্তর
 রাত্রেতে সপিতে কিবা প্রণয়-চন্দ্রিমা ?
 না দিব সমরে যেতে থাকিতে জীবন,
 যতপি যাইতে সাধ বধ অধিনীরে
 কেমনে ভুলিব নাথ ও চারু বদন,
 কহ নাথ,—কহ শূরা,—কহ তা দাসীরে !
 এত বলি ইন্দুমতী কাঁদিল নীরবে
 যতনে হৃদয়ে তুলি হৃদয়-রতনে
 কহিলা তরুণী যেন বীণার আরাবে—
 ঝরিল প্রণয়াবেগে আসার নয়নে ।
 কঠিন প্রণয়-পাশে হৃদয়-মন্দিরে
 চির কারাবদ্ধ আমি আনন্দদায়িনি

প্রীতিপূর্ণ বাণী, যেন প্রহরী বিচরে
 প্রেমময় মুখ-ইন্দু, কোমল চাহনি ;
 ধরা মাঝে বীরসিংহ কে আছে এমন—
 বলীয়ান প্রেম-পাশ করিতে বিদার ?
 স্বেচ্ছায় রতন-হার কে করে অর্পণ
 কে বল জলধি মাঝে,—হেন দুরাচার ?
 কিন্তু প্রিয়ে সেনাপতি-পদে অভিসিক্ত
 করেছেন জ্যেষ্ঠতাত যাইতে আহবে
 সজ্জিত কর্বর-সৈন্য,-হ'য়ে প্রেমাসক্ত—
 কেমনে অবলা প্রায় রহিব নীরবে ?
 সিংহের রমনী হ'য়ে জম্বুকীর প্রায়
 কেমনে কাটাবে কাল জীবন-জীবন
 চির কাল এ কলঙ্ক রটিবে ধরায়
 “রণ-সাজে সেজেছিল তরনী যেমন,”—
 অতএব বৃথা চিন্তা কর পরিহার
 করহ প্রফুল্ল মুখে যাত্রা-আয়োজন
 সুখ-দুঃখ জন্ম মাত্র লিপি বিধাতার
 প্রমায়ুর অবসানে অবশ্য নিধন ।
 বিচিত্র মায়ার মায়া কে বুঝে সংসারে
 বিমোহিতা ইন্দুমতী বীরাজনা-প্রায়
 আলিঙ্গনে ভোষিলেন সরমা-কুমারে,
 ধমনীতে উষ্ণতর শোণিত খেলায় ।

বীরত্ব-গৌরবে মত্ত, মত্ত মাতঙ্গিনী—
 ধরিল। তৈরবী-মূর্তি আরক্ত নয়ন
 চম্পক-বরণী হল রক্তিম রঙ্গিনী
 নিষ্কেপিল। ভূমে সর্ব কুসুম-ভূষণ ।
 দানব-তনয়া ভীমা রাক্ষস-ললনা
 বিকট রাক্ষসী-বেশে নিরখি তখন
 বসন্ত সে রতি-কান্ত লইয়ে অঙ্গনা
 আতঙ্কে উচ্ছান ত্যজি করিলা গমন ।
 বামাকণ্ঠে ভীম নাদ শুনিয়া শ্রবণে
 অমলা দৌড়িল তথা সেরূপ নিরখি
 কাঁপিল সভয়ে, মুদি যুগল নয়নে
 বীরমদে আরক্তিম হেরি পদ্য-আঁখি ।
 পতির পিধান-অসি টানিয়া সবলে
 সদর্পে কাঁপায়ে ধরা, বলে ভীমরবে—
 “কেন নাথ যাবে হেন হীন বণস্থলে
 মূর্ত্তে নাশিব যত অরিগণ সবে” ।
 হৃদয় রঞ্জন নহে রমনী-প্রকৃতি
 সর্ব কার্যে সমভাবে অংশী যে যাহার
 সম্পদে-বিপদে নারী না হইলে সাথী
 সতীর কর্তব্য রক্ষা পায় কি তাহার ?
 বাসনা যৌবন সঙ্গে হইবে বিলয়
 বিমল দাম্পত্য-প্রেম অনশ্বর স্থির

যে প্রেমে বিভুর প্রেম হয় অভ্যদয়,
 কদিন রহিবে হেন অনিত্য শরীর ?
 থাক তুমি এ উচ্চানে আমি যাব রণে
 নিমিষে নাশিব যত অরাতি দুর্জনে
 উড়াব বিজয়-ধ্বজা সিংহল-গগনে
 রক্ষিব সুনাম তব, অরি নিসূদন ।
 ধাইল সবলে বামা উগ্রচণ্ডা-প্রায়
 উলঙ্গ রূপাণ করে আলু খালু কেশ
 অস্তুর বিনাশে যেন মহেশ-রমায়
 বীর-মদে মাতোয়ারা ধরে কালী-বেশ !
 বহিল তরনী হৃদে সুখ-প্রস্রবন
 ছুটিয়া নিবারে জোরে উন্মত্ত বামায়
 সপ্রেমে কপোলে করি কতবা চুশন
 আলিঙ্গনে তুষিলেন স্বর্ণ প্রতিমায় ।
 মধুর বচনে তুষি তরনী তখন
 কহে তরনীর তুমি সুর্যোগ্যা রমণী
 কিন্তু যদি নারী করে অরাতি-পতন,
 কর্বুর-কলঙ্ক-ধ্বনি রটিবে ধরনী ।
 রহ প্রিয়ে শান্ত মনে এ শান্তি ভবনে
 আনন্দে বিদায় দেও সদানন্দময়ি
 দেখাও হৃদয়-বল অতুল্য ভুবনে
 ভাব পরমেশে যেন হই রণ-জয়ী ।

পতির আদেশ-বাণী অলঙ্ঘ্য অটল
 ধরি পদ ধূলি শিরে যাত্রা-আয়োজনে
 সখী-সঙ্গে চলে চির-সঙ্গের সম্বল
 কে পারে মায়ার মায়া খণ্ডিতে ভুবনে ?
 ভবনে পশিয়া সতী পতি-পদে পড়ি
 নমিয়া,—স্বর্ণ কুন্ত করে সংস্থাপিত
 সিন্দুর পল্লবে তায় সুসজ্জিত করি
 ত্রায় মঙ্গল দীপ করে প্রজ্জ্বলিত
 পতি সনে সপ্তবার করি প্রদক্ষিণ
 দম্পতি নমিলা যবে উদ্দেশ্যে শঙ্করী
 ইন্দুর সিন্দুর-বিন্দু নিরখি মলিন
 তরনী ভকতি, প্রেমে স্মরিল। শ্রীহরি ।
 প্রকম্পিত বাম আঁখি অতি অলক্ষণ
 নিশীথে বায়স করে অশিব ঘোষণা
 বাম বাহু আর্চস্থিতে আরম্ভে স্পন্দন
 চৌদিকে হেলিলা রক্ষ অমঙ্গল নানা ।
 মায়ার প্রপঞ্চে মুগ্ধা সতী ইন্দুমতী
 স্বকরে সায়ক তুণে করিয়া পূরণ
 অশ্রু-পূর্ণ নেত্রে বক্ষে ধরে রক্ষপতি
 তরনী চলিলা করি অন্তিমালিঙ্গন ।



ষষ্ঠ-সর্গ ।

সুহাসিনী নিশিথিনী কর্বরু আলয়ে
 তারা-হারে সুসজ্জিত সুনীল গগন
 প্রদীপ্ত চন্দ্রমালোকে, —সরসী-হৃদয়ে
 প্রেমোন্মত্ত কুমুদিনী সহাস্ত বদন ।
 চকোর দম্পতি রত স্নিগ্ধ সুধাপানে
 উজলিছে দীপ-মালা নক্ষত্রের প্রায়
 তামসী-ধূসর-বাস অদৃশ্য নয়নে
 যামিনী সুপরিণতা করিছে দিবায় ।
 বাজিছে বাদিত্র নানা অশ্বিকা-মন্দিরে
 কাংশ, ঘণ্টা, করতাল, দিব্য শঙ্খনাদে
 প্রেমের তরঙ্গ খেলে অররু-অস্তুরে
 গাইছে গায়ক-বৃন্দ নাচিয়া আহ্লাদে ।

রত্নাসনে প্রতিষ্ঠিতা দেবীর মুরতি
 হেম, রত্ন, মণিময় ভূষণ-ভূষিতা
 চতুর্ভুজা মুক্তকেশী মহা ভীমাকৃতি
 নৃমুণ্ডমালিনী শ্যামা রুধির রঞ্জিতা

কর-পদ-নখে কোটি চন্দ্রমা উদয়-
 স্ত্রফলিত বিশ্বফল অধরে প্রকাশে
 নীল সৌদামিনী-ছটা রূপে অভ্যুদয়
 অলকা ঝলকে ঘন তিমির বিনাশে
 লম্বোদরা বাঘাম্বর বিমুক্ত, কবরী
 বরাভয় মুণ্ডকরে উলঙ্গ রূপাণ
 পীনোন্নত পয়োধরা ঘোরা দিগম্বরী
 পদ-শায়ী শব-রূপি সর্বেশ ঈশান ।

স্বর্ণ মঙ্গল কুম্ভ পল্লব-অন্বিত
 সিন্দূর-রাগ-রঞ্জিত চর্চিত চন্দনে
 প্রফুল্ল প্রসূন—চারু-ভূষণালঙ্কৃত
 সস্তোষে নাসিকা-তৃণ্ড বাস বিতরণে

অতসী, অপরাজিতা, কিংশুক, কাঞ্চন,
 মল্লিকা, মালতী, যুথী, বেলী, নাগেশ্বর
 ভূচম্পক, কুরুবক, মাধবী, রঙ্গন,
 রক্তোৎপল, শতদল, গোলাপ, টগর ।
 অশোক, বকুল, যাতি, জবা, কৃষ্ণকেলী,
 স্বর্ণ চম্পক, কত প্রফুল্ল মন্দার ;
 পুষ্পে পুষ্পে তুঙ্গাকার স্ত্রফলের ডালি
 শ্রেণীবদ্ধ পূজাযোগ্য সামগ্রী সম্ভার
 সচন্দন বিলুদল দুর্বল অগগন
 বাসিত পানীয় নানা রয়েছে সজ্জিত

হেম পাত্রে দিব্য অন্ন সউপকরণ
 ধূপ-দানে ধূপ,—স্বতে দীপ প্রজ্জ্বলিত ।
 সুপটু বসনে ভূষি পবিত্র আসনে
 ভক্তি ভরে উপবিষ্টা সরমা সুন্দরী
 তনয়-মঙ্গল-আশে বিবিধ বিধানে
 তোষিতে অরিষ্ট-হরা দেবী মহেশ্বরী ।
 আর্দ্র-চিত্ত রোমাঞ্চিত সিন্ধু নেত্র-নীরে
 কৃতাজ্জলিপুটে স্তুতি করে রক্ষরমা
 ত্রিদিবে কম্পিত-প্রাণ অমর নিকরে
 কাতরে প্রেরিলা হারা মায়া মনোরমা
 সহসা সরমা সতী নিদ্রায় কাতর
 হরিলা ভকতি জ্ঞান সুষুপ্তি-রূপিণী
 ঘোরতর নিদ্রাবেশে আসন উপর
 শয়ন করিলা এবে দনুজ ভামিনী ।
 নড়িল মঙ্গল-কুস্ত পদ সঞ্চালনে
 পূজাভঙ্গে মনোরঙ্গে মহেশ-মহিষী
 চলিলা কৈলাস-পানে হরিত গমনে
 সিদ্ধ নির্জ্জরের কার্য্য, পরম উল্লাসী ।
 অলক্ষ্যে ভৈরবী চলে মরাল-গামিনী
 রুণু রুণু ধ্বনি মাত্র নূপুরে বাজিল
 নিদ্রারূপী মায়া-দেবী সহাস্ত বদনী
 ধীরে ধীরে সরমার সদন ত্যজিল ।

অপূর্ব মায়ার মায়া কে বুঝে সংসারে ?
 রহিল মঙ্গলকুন্ত যথা-সংস্থাপিত
 পূজোপকরণ যত সুসজ্জিত মতে
 অম্বিকা-মন্দির-দ্বার রহে অর্গলিত ।
 লঙ্কার সীমান্তে এলে হর-মনোরমা
 রোধিলা গমন-পথ রক্ষ-ভক্তি আসি ।
 শুভ্র অঙ্গ, শুভ্র বেশ শরদিন্দু সমা
 বিমল বদনে যেন অমিয়ের রাশি ।
 কহে সতী,—“হৈমবতি ভকত বৎসলা
 বর্ণন করয়ে যত সাধক সৃজন
 কেমনে শিথিলে হেন কপটের ঢলা ?
 পাষণ-নন্দিনী হেরি পাষানী যেমন !
 প্রিয় ভক্ত নৈকষেয়,—অকুল সাগরে—
 তুমি মাত্র এ বিপদে পরিত্রাণ-ভেলা
 কোন প্রাণে সে সন্তানে ত্যজি হর্ষ ভরে
 চলিছ কৈলাসে মাতঃ, একি তব খেলা ?
 উত্তরিল ভোগবতী “বুথা দোষ সতি
 কি না জান তুমি ভবে, সবি কস্মাধীন
 জন্ম-মৃত্যু শুভাশুভ ফলদা নিয়তি
 দোষের পশরা মোরে চাপে অব্বাচীন ।
 প্রাক্তন-পীড়নে জীব চলে মৃত্যু-পুরে
 শঙ্খিনী-কবলে যথা কাকোদর-গতি

করস্থিত রজ্জু যথা সর্প-রূপ ধরে—
 দংশে গত-আয়ু জনে নিরখি নিয়তি ।
 কি আছে শকতি মোর কহ গুণবতি
 চিরদিন আমি তব বাঁধা প্রেম-পাশে
 তোমার মনের টানে রুদ্ধ মম গতি
 বল কি কামনা দেবি আমার সকাশে ?
 কহিলা ভকতি তবে “জগত বন্দিনি—
 চল একবার যথা নিকষা-নন্দন,—
 দিগন্ত ব্যাপিত যার ভকতি-কাহিনী
 হেন ভক্তে চিরতরে করিতে বর্জ্জন—
 কি ছুঃখ তোমার মাতঃ, জানি ভাল মতে ;
 বিধি-লিপি কে করিবে কিরূপে খণ্ডন ?
 তথাপি এ চিত্র মাতঃ দেখাও জগতে—
 ভক্তাধীনা তুমি বলি ব্যাপ্ত ত্রিভুবন !
 যেমতি চুম্বক করে লৌহে আকর্ষণ
 তেমতি চলিলা গৌরী ভকতির টানে
 ত্রিদিবে কম্পিত-প্রাণ সুপর্ব্বাণ-গণ
 মায়ায় প্রেরিলা স্থায়ী অভিষ্ট-সাধনে !
 পশিলা গোপনে বামা রাবণ-ভবনে
 সুবর্ণ পর্য্যঙ্কে যথা লঙ্কা-অধিপতি
 সুসুপ্তির অঙ্কে সুপ্ত বিংশতি-লোচনে
 অলক্ষ্যে কহিলা তায় দেবী হৈমবতী

প্রাণোপম ভক্ত রক্ষ, হৃদয়ের ধন
 ভক্তি-ডোরে বন্ধ আমি রক্ষিণু আলয়
 পূর্ব বর-বার্তা বাছা কররে স্মরণ
 “তাজিব ভবনে হ’লে নর-অভ্যুদয়” !
 বড় ভালবাসি তোর মনোরম্য পুরী
 তাই মহানন্দে ছিণু, নর-আগমনে
 সীতা সতী তপ্ত শ্বাসে এবে জ্বলে নরি
 চলিণু অন্তিম দেখা এই তোর সনে ।

নিদ্রায় সে ইন্দ্র-জাল-ময়ী দেবী-বাণী
 পশিলে শ্রবণে তবু মোহিত মায়ায়
 বারত্রয় উচ্চারিল “যাও ভব-রাণি”
 রঞ্জেন্দ্র বিবসেন্দ্রিয় স্রীয় রসনায় ।
 রাবণের স্মৃথ-দীপ করিয়া নির্ব্বাণ
 চলিলা নীরবে কাঁদি হর-মনোরমা
 স্বপনে আকুল হেরি রঞ্জেন্দ্রের প্রাণ
 আবার পশিলা শূঁহে ভক্তাধীনা বামা ।
 ভক্তি-বলে মায়া-পাশ কাটিয়া অমনি
 “কোথা মা তারিণী” রক্ষ ডাকে উচৈঃস্বরে
 অন্তরে অন্তরময়ী উদিল। তখনি
 কহিলা নিকষাত্মজ যুক্ত যুগ করে ।
 “রাবণ-সম্বল তুই জীবন মরণে
 কেমনে শস্তানে মাগো করিবি বর্জ্জন

হৃদয় মন্দিরে তোরে রাখিব যতনে
 কুপুল কি মাতৃ পাশে বিরূপ ভাজন ?
 “সন্মুখ সমরে যদি করিস স্মরণ”
 কহে গৌরী “যত্নে অঙ্কে করিব অমনি
 রক্ষ ভক্তি পাবে দীপ্তি এ তিন ভুবন
 নিয়তির গতি রোধে অশক্ত বাহনি” ।
 এত বলি হৈমবতী হলে অন্তর্ধান
 নিরাশা-বারিধি-মগ্ন রক্ষোজ্জ্বলরবি
 নিদ্রা-মোহে সমাচ্ছন্ন কর্বুর প্রধান
 স্মৃতি-দরপণে হেরে বিষাদের ছবি
 সুষ্প্তি-রূপিণী মায়া জগত-মোহিনী
 হরিলে ভকতি, জ্ঞান, মোহিত রাবণ
 ত্রিদিবে চলিল মায়া লইয়া যামিনী
 রক্ষেন্দ্রে বিষাদ-জলে করি বিসর্জন ।
 শ্রীহীন অম্লান লক্ষা,—তারিণী বিহনে,
 কমলা বিহনে যথা ত্রিদিব দুর্গতি,
 অথবা দেহীর প্রাণ হরিলে শমনে
 মৃত দেহ ধরে যথা ভীষণ মূরতি !





সপ্তম-সর্গ ।

প্রভাত হইলে নিশি প্রকৃতি সুন্দরী
বৈদেহীর যজ্ঞগার অবসান তরে
পবিত্র ধবল বাস পরিধান করি
পূজে যেন পুষ্প-নীরে ত্রিলোক-ঈশ্বরে
স্বীয় কুল-কুল-বধূ কর্ণবুর-আলয়
ভূগিতেছে অবিরত যাতনা ভীষণ
নিরখি বিষাদে মগ্ন ক্রোধিত হৃদয়
পূর্বে উদিল রবি লোহিত বরণ ।
পড়িল সোনালি ছটা নীল সিঙ্কু জলে
স্নাত-কায় সুশীতল বহিল পবন
নাচিল তরঙ্গরূপে যেন কুতূহলে—
প্রচেতা,—অচিরে জানি লঙ্কার পতন
কুমুদিনী মনোভুঞ্জে ঢাকিল বদন
নীহার-নয়ন-বারি ঢালিয়া নয়নে
পতি-হেরি কমলিনী সমুৎফুল্লমন
শিশিরে শোভিল তরু মুকুতা-ভূষণে
স্নান মুখ চন্দ্রমার করি নিরীক্ষণ
স্বখেদে ডুবিলা তারা বিমান-পাথারে

পতি-অঙ্ক অনিচ্ছায় করিয়া বর্জজন
 যুবতী ঢাকিল আঁখি সলজ্জ অন্বরে ।
 দিবা-ভীত অঙ্ককার আশ্রয়ের তরে
 মহৎ সদনে ত্বরা করে পলায়ন
 উচ্চ নীচে, সম যেই মমত্ব বিস্তারে—
 রঞ্জে গিরি গুহা-বক্ষে,—উন্নত জীবন ।
 শ্রলিত দলিত শুদ্ধ কামিনীর মালা
 ঘুম-ভাঙ্গা রাজা আঁখি রাজে বাতায়নে
 ললিত রাগিনী তানে মানস উতলা
 বিভুর মহিমা গায় বৈতালিকগণে
 চলিলা সন্তাসীকুল ত্যজিয়া নগর
 ছিন্নচীর শিরো'পরে করি সংস্থাপন
 দ্বিজগণ রক্তজবা ধরি দুই করে—
 অর্পিছে তোষিতে রাজা সহস্র-কিরণ ।
 ত্রিয়ামার অবসানে ভীম কোলাহলে
 গর্জিলা করবুরবৃন্দ প্রচণ্ড বিক্রমে
 সে গম্ভীর নাদ যেন পূর্ণ হলাহলে—
 মিলি বিদ্ধ শরোপম সরমা-মরমে ।
 চমকি উঠিলা সতী উন্মাদিনী প্রায়
 ব্যাধ-শর-বিদ্ধ যথা সূপ্তাকুরঙ্গিনী
 তেমতি ধাইলা বামা ঘোর আশঙ্কায়
 প্রাণোপম সূত-পানে মণিহারী ফণী

নানাস্থান ভ্রমে সতী বিমুক্ত কুন্তলা
 বসন অঞ্চল তার লোটায় ধূলায়
 অশ্রু-মুখি রাজা আঁখি বিবশা ব্যাকুলা ।
 অশিব ভাবনা-সিন্ধু অস্তুরে খেলায় ।
 হতাশে পশিয়া কক্ষে নিরখি নন্দনে
 ভূষিত সমর-সাজে পর্যাক-উপর
 পড়িলা বিটপি যেন ঝটিকা-তাড়নে
 কাঁপিল সরমা-অঙ্গ ভয়ে থর থর ।
 মাতৃভক্তিরসোন্মত্ত অস্তুরে তরণী
 বন্দি সে পদারবিন্দ যুক্ত যুগ করে
 কহে পুনঃ পদ-প্রাপ্তে “কি হেতু জননি
 ঢালিছ অঙ্গ অশ্রু অধৈর্য্য অস্তুরে ?
 হের মা কিরীট শিরে সূবর্ণ মণ্ডিত
 ভূষণ নহে মা উহা বিজয় কেতন
 ইন্দ্র-জয়ি ইন্দ্র-ভূষা এনে ইন্দ্রজিত
 প্রীতি-ভরে দশদা মোরে করেছে অর্পণ ।
 সাজাইলা ভ্রাতৃবধূ প্রমিলা সুন্দরী
 স্বকরে সমর-সাজে ধন্য বীরাজনা
 জ্যেষ্ঠ তাত অর্পে অসি রাণী মন্দোদরী
 পরাইলা মণিময় অলঙ্কার নানা ।
 তব পুত্র-বধূ করে উলঙ্গ কৃপাণ
 উন্মত্তা স্বকরে অরি করিতে বিনাশ

কাঁপায় বীরত্ব-দাপে দিগন্ত বিমান
 বিদায় প্রদানে হাসি মনে রণোল্লাস ।
 আর তুমি বীর-পত্নী,-বীরের জননী
 রঞ্জনীর ভ্রাতৃ-বধূ, গৌরব-আলয়
 ইন্দ্রজয়ী ইন্দ্র-জিত পিতৃব্য-ঘরণী,
 পুত্র-রণ-বার্তা শুনি ত্রাসিত হৃদয় !
 ছি ছি ! মাতঃ, বড় দুঃখ উপজে অন্তরে
 যার বীর-দাপে-কাঁপে-অমর নিকর
 হেন বীরে যে জননী ধ'রেছে জঠরে
 সমরের নামে তাঁর ত্রাসিত অন্তর ?
 উঠ মাতঃ,—উঠ ত্বর কেশরী-বিক্রমে
 দীক্ষা দিয়ে রণ-মল্ল জাগাও ধমনী
 কাঁপিবে, কাঁপিবে,—তব পুত্র-পরাক্রমে
 আতঙ্কে অরাতিকূল, প্রসাদে জননী ।
 সরমা স্বনন্দনের উত্তেজক বাণী
 উরগ-নিহত বিষ অনুমানি মনে
 সূত-অঙ্কে করি কাঁদে স্নেহাবেগে রাণী
 অশিব-ভাবনা দহে দাব-হতাশনে
 সরমা কহিলা বাছা এ কাল সমরে
 সজ্জিত, বধিতে কিরে অভাগা জননী
 দুঃখিনী-অঞ্চল-নিধি স'পে দস্যু-করে
 কেমনে ধরিব প্রাণ কহ যাছুমানি !

হিত-ভাষ শুনাইলে জনক তোমার
 রক্ষ-রাজ-পদাঘাতে হ'য়ে অপমানী
 ত্যজিলা সখেদে যবে সোণার সংসার
 তোমাধনে বক্ষে নিয়ে রহে অভাগিনী ।
 কত ক্লেশে রক্ষ-পুরে রহি, বাছাধন,
 সতত শঙ্কিত মন, রণ-সিঙ্ধু-জলে—
 কখন নিক্ষেপে পাপী জীবন-রতন
 শঙ্কা-দ্রুমে বিষফল ফলে কস্ম-ফলে ।
 চির অন্ত হবে রক্ষ-গৌরব-তপন
 অচিরে মজিবে পাপে মন্দোদরী-পতি
 রক্ষ-বংশ-ধ্বংস-তরে রাম-নারায়ণ
 অবতীর্ণ ধরাধামে, কে রোধে নিয়তি ?
 নহে কে শুনেছে কবে শীলা জলে ভাসে,—
 জলধি-বন্ধন করে বনের বানরে,—
 মারুতি-নীরধি-লজ্জি প্রতিভা-প্রকাশে,—
 দেবেন্দ্র-বাঞ্ছিত-লক্ষা ভস্মাকার ধরে ?
 যে সকল মহাবীর লক্ষা-অলক্ষার
 অবহেলে জিনে ছিল শমন-বাসবে !
 রাঘব-সমরে কেহ না ফিরিল আর
 একে একে সকলেই পরিণত শবে
 বীর-প্রসবিনী লক্ষা এবে যোধ-হীন
 সর্বত্র ধর্ম্মের জয় বিধির বিধান

রাক্ষসের গর্ব-রবি ক্রমশঃ মলিন
 ঘেরিল কলুষ-মেঘে না হেরি কল্যাণ ।
 ছাড়, ছাড় রণ-বেশ অবোধ কুমার,—
 কে আছে এভাবে জিনে জানকী-জীবনে,—
 বিষ্ণু-দেবী মহাপাপী হ'লে দুরাচার—
 কে তারিবে বল বাছা শমন-তাড়নে ?
 কার্য্য নাই এ ঐশ্বর্য্যে তোমা বক্ষে-লয়ে
 শরণ লইব রাম-পদ-কোকনদে
 নিষ্পাপ হইবে দেহ পূজিলে শ্রীহরি
 কি করিবে মোহময় পার্থিব সম্পদে ?
 অশ্রু-পূর্ণ নেত্রে সতী চুম্বি স্নত-মুখে
 খুলিলা সরমা সর্ব্ব সমর-ভূষণ
 অলঙ্ঘ্য জননী-বাক্যে ভাসি মনোদুঃখে
 স্মরিলা মানসে বীর, পতিত-তারণ ।
 ভক্তিভাবে মাতৃপদ করিয়া ধারণ
 কহিলা তরণী, “মাতঃ; এতব সংসারে
 জন্ম, মৃত্যু জন্ম-মাত্র বিধির লিখন
 না হ'তে প্রমায়ু অন্ত কে বধিতে পারে ?
 কৰ্ম্মক্ষেত্র-ভবভূমি নাট্টের ভবন !
 যে যার নির্দিষ্ট কৰ্ম্ম সম্পাদন তরে
 বারং বার রূপান্তর করয়ে গ্রহণ
 কৰ্ম্মান্তে নিয়তি মতে নব বেশ ধ'রে ।

কেবা কার পিতা, মাতা, দুহিতা, নন্দন ।
 কেবা কার শত্রু, মিত্র, ভ্রাতা, বন্ধু জায়া
 পরমাত্মারূপে ব্রহ্ম সর্ববসটে রন,
 জীবাত্মা উহার মাত্র ভ্রমাত্মক ছায়া ।
 পঞ্চভূত সর্বজীব-দেহ-উপাদান
 একাত্মার অংশ যদি রহে সর্ব ঘটে
 আকার-বিভাগে মোহে জন্মে ভেদ-জ্ঞান
 মমত্বের ধ্বংস মাত্র একত্ব সংঘটে ।
 যদি মোর কৰ্ম্ম-লীলা নাহি হয় শেষ
 হলেও রাঘব বিষ্ণু,—ব্রহ্ম বিশ্ব-পতি
 পরম পুরুষ তিনি,—জান সবিশেষ—
 না আসিতে অন্তকাল বধে কি শক্তি ?
 যদি মম নিয়তির এ অন্ত-সময়
 বিধি, বিষ্ণু, মহেশ্বর নারিবে রক্ষিতে
 বৃথা-চিন্তা করি কেন বিষন্ন হৃদয় ?
 মহাজ্ঞানবতী ভূমি এ রক্ষ-পুরীতে ।
 অভিসিক্ত রণে আমি না গেলে সমরে
 এ অকীর্ত্তি চিরকাল রবে ধরাধামে
 হাসিবে রমণীবৃন্দ নিরখি তোমারে
 কলঙ্ক অপিব কেন অকলঙ্ক নামে ?
 সমুজ্জ্বল হবে লক্ষা বীর-প্রসবিনী
 এ হেন পুয়শঃ কেন হারাব হেলায়

বীর-মাতা বলি খ্যাতি রবে গোরবিনী ;
 সন্তোষে সমরাদেশ প্রদান আমায়—
 হেরিব নয়নে মাতঃ, রাজিব-লোচন
 শ্যামল জলদ-তনু গোলক-ঈশ্বর
 চিরারাধ্য দ্বিত্ব পদ করিয়া বন্দন
 পবিত্রিব মোহময় কলুষ-অন্তর
 অচিরে পূরা'তে ভক্ত তরনী-বাসনা
 মায়াদেবী প্রবেশিল সরমা-অন্তরে
 ভুলিলা পার্থিব ভাব অশিব-ভাবনা
 জাগিল বিবেক-জ্ঞান নিমিষ-ভিতরে !
 ভক্তিভাবে পুত্র-অঙ্গে রাম-নাম-মালা—
 লিখিলা সরমা সতী পবিত্র চন্দনে
 “রণজয়ী হও বৎস” বলি আশীষিলা
 নমিলা ভকত রক্ষ জননী-চরণে ।
 কঙ্কাস্তরে পিতৃদেব-পাছুকা যুগল
 অর্চিত কুসুম, ধূপ, দীপ, সচন্দনে
 বারত্ৰয় প্রনমিলা লোটা'য়ে ভূতল
 বিজ্ঞাপিলা পিতৃ-ভক্তি ত্রিলোকের প্রাণে
 পুনঃ রণসাজে রক্ষ স্তন্দন উপর
 বসিয়া সদর্পে করে ভীম হৃহকার
 কাঁপিল ত্রিদিবে যত অমর নিকর
 গর্জিল তৈরবারাবে জলধি অপার ।



অষ্টম-সর্গ ।

স্বর্ণ-লঙ্কা-প্রান্ত-গলে রথ-শ্রেণী-হার
দোলায় চৌদিকে যত রাঘব-বাহিনী
বিরঞ্জিত শ্রুন্দনের ধ্বজ-পতাকার—
কম্পন-তরঙ্গে খেলে রণ-তরঙ্গিণী
অশ্ব, করী, রথীকুল, তৃণের মতন
তরঙ্গ-আবর্তে-রঙ্গে ভাসিয়া বেড়ায়
শিবির-আকারে যেন কূর্ম্য অগণন
সলিল-উন্নত-শিরে উকি দিয়ে চায় ।
সীতা-শোকে সন্তাপিত বিষণ্ণ বদন
নিষণ্ণ পশ্চিম-প্রান্তে রাঘবেন্দ্রবলী
সঙ্গে মিত্র বিভীষণ, অনুজ লক্ষণ
অঞ্জনা নন্দন আর জাম্বুবান শূলী ।
ভল্লুক সৈনিক বৃন্দ শৈল-মালা প্রায়
বিবিধ আয়ুধ করে নিয়ত সজ্জিত
ভীম দর্পে, ভীম তেজে, বীরত্ব-প্রভায়
স্তুতিত, প্রদীপ্ত, করে গগন কম্পিত
পূর্ব্ব দ্বারে মহাবীর নীল সেনাপতি
দক্ষিণে অঙ্গদ সঙ্গে বানর-বাহিনী

উত্তরে কিস্কিন্দা-নাথ সূত্রীব স্মৃতি ।
 পঙ্গপাল-দল প্রায় মৰ্কটের শ্রেণী ।
 নীলাম্বুর উর্ষি সম নিত্য-প্রবাহিত
 স্রোতস্বিনী-স্রোত যথা অবিরাম-গতি
 তেমতি রাঘব-সৈন্য নিত্য নিয়োজিত
 সাধিতে শ্রীরাম-কার্য্য তোষিতে শ্রীপতি ।
 চারি দ্বারে চারি দল প্রচণ্ড বিক্রমে
 ছুছুকারে প্রকম্পিত করিছে গগন
 কোটি কোটি রথে রথী, পদাতি আক্রমে
 বহির্গত রক্ষ বীরে, কৃতান্ত যেমন ।
 শোক-মেঘে-আভাহীন রাম-প্রভাকর
 সঞ্চালিয়া রক্ত-স্রোত কামিনী-কারণ
 রণোল্লাস-বিরহিত সন্তপ্ত অন্তর
 নিরন্তর করে চারু কমল-নয়ন !

অকস্মাৎ লক্ষা-মাবে বিজয়-নিনাদ
 সৈনিকের আশ্ফালন ফোদণ্ড-টঙ্কার
 করীর বৃংহতী ঘোর, অশ্ব-হ্রেষা-হ্রাদ
 বিশ্ব বিনাশিতে যেন রোষে বিশ্বাধার !
 শ্রবণে, ভীষণ ধ্বনি কাঁপায় বিমান
 জানকী-রঞ্জন কহে অঞ্জনা-নন্দনে
 মকরাক্ষ-শোক-বহ্নি না হ'তে নির্বাক
 কে সজ্জিত ঝম্প দিতে রণ-হুতাশনে ?

গুপ্তভাবে গুপ্তবেশে প'শে লক্ষাপুরে
 সবিস্তার সে বৃত্তান্ত করহ বর্ণন ।
 রাম-পদ ধরি শিরে পুলক অন্তরে
 জয়-রাম-নাদি হনু হল অদর্শন ।
 সূক্ষ্মতম করি সেই প্রকাণ্ড শরীর
 ভীষণ সে তেজ-পুঞ্জ গোপনে লুকায়
 জলদ-আবৃত যেন প্রদীপ্ত মিহির
 ভস্ম-সমাবৃত শিব কিম্বা শোভা পায় !
 অতি দ্রুত উপনীত হেম-নিকেতনে
 নিরখিলা অগণিত সৈন্য-দল-মাঝে
 সুরক্তিম বাজি-যুক্ত নীলিম শ্রুতনে
 তারকা-বেষ্টিত যেন চন্দ্রমা বিরাজে
 শঙ্খ-নাদে কাঁপে তার দিগন্ত বিমান
 মস্তকে কিরীট দিব্য, করে তীক্ষ্ণ অসি
 বিবিধ আয়ুধ রথে পর্বত প্রমাণ
 তেজে দীপ্ত দিধাকর-কর-লুপ্ত-মসী ।
 সর্ববাঙ্গে ভূষিত তার রাজ-আভরণ
 সাজায় কটক ঠাট ভুবন অস্থির
 হস্তী, অশ্ব, ধরণীর উজ্জ্বল রতন
 মাতায় বীরেন্দ্রবৃন্দ কম্প পয়োধির ।
 মুখে মাখা মৃগমদ স্নগন্ধ কস্তুরী
 নানাবর্ণ মণিহার গলে ঝল-মলে

নীরদের অঙ্কে কিবা স্থিরা সৌদামিনী
 রত্ন-খণ্ড-সুমণ্ডিত রথ-ধ্বজদলে ।
 স্বর্ঘরে চলিল রথ মাণিকের চাকা
 প্রভা প্রভাকর-প্রভা করিছে বিলয়
 কেতনে শমুন-অস্ত্র রামনাম আঁকা
 হুঙ্কারি ঘোষিলা বীর শ্রীরামের জয় ।
 ভুবন-বিজয়ী করে কার্ম্মুক ধারণ
 সদর্পে রথীন্দ্র দিলে কোদণ্ড-টঙ্কার
 “তরণী-বিজয়-নাদে” রক্ষরথিগণ
 কাঁপাইলা সুরপুরী কম্প দেবতার !
 এশ্বযোগে সিদ্ধ করি স্বীয় মনস্কাম
 স্বঅঙ্গ বর্দ্ধিত করি পর্ব্বত-প্রমাদ
 লক্ষ্য ত্যাগে পড়ে হনু বলি জয়রাম
 প্রপাতে বসুধা সতী হল কম্পমান !
 শিবিরে পশিয়া প্রেমে অঞ্জনা-নন্দন ।
 নমিলা জ্ঞানকী-কান্ত শ্রীরাম-শ্রীপদে,
 প্রনমিয়া পূজ্যতম উন্মীলা-রঞ্জন,
 বন্দিলেন নরপতি স্ত্রীগ্রীব-অঙ্গদে ।
 বিভীষণে করি প্রীত, প্রীতি-সস্তাষণে—
 তোষিলেন ক্রমে রঘু-সেনাপতি সবে
 জাম্বুবানে করি তৃপ্ত প্রেম-আলিঙ্গনে
 শ্রীরামের পদ-তলে বসিলা নীরবে ।

সন্নেহে হনুর করি মস্তক-আভ্রাণ
 'কহিলা মৈথিলী-নাথ স্নেহ-মাথা স্বরে
 কহ বৎস কোন বীর কাঁপায়ে বিমান
 ছুকারি পশিছে রণে ঘোর আড়ম্বরে ।
 ভক্তি-ভরে-যুক্ত-করে বন্দিয়া-চরণ
 মারুতী কহিলা প্রভো শুন সীতা-পতি
 অঙ্গে রঙ্গে খেলে কত শশাঙ্ক-কিরণ
 কভু নাহি হেরি হেন রাক্ষস-মূরতি !
 পূর্ণ-সুধাকর-সম প্রফুল্ল-বদন
 বীরত্ব-প্রতিভা যেন কুটিয়া পড়িছে
 কমলজ-সুকোমল-দল দুনয়ন
 বিভূ-প্রেম-রসে যেন মগন রয়েছে ।
 নৃপেন্দ্র-লাঞ্ছিত অঙ্গে বিচিত্র বসন
 ললাটে তিলক, অঙ্গে লেখা রাম-নাম
 অগণ্য সায়েকে পূর্ণ সুদিব্য স্তন্দন
 রসনা-উচ্চারণে ঘোরে জয়-জয় রাম ।
 “জয়ব্রহ্ম-সনাতন” অঙ্কিত নিশানে
 সঙ্গে সঙ্গে সাজে কোটি অশ্ব, রথ, হাতী
 পিপীলিকা-শ্রেণী-রথী কাঁপায় বিমানে
 শমন-কিঙ্কর-সম অসংখ্য পদাতি !
 সবিশেষ পরিচয় আমি নাহি জানি
 তরণী উহার নাম শুনিমু শ্রবণে

রঞ্জেন্দ্র-আত্মজ হেন বেশে অনুমানি
 অঙ্কে করি সদা রাখি এ বাসনা মনে ।
 ছুটিল শ্রীরাম-মনে স্নেহ-প্রস্রবন
 হইল রোমাঞ্চ তনু,—অবশ শরীর
 কাঁদিল কোমল প্রাণ, ঝরিল নয়ন
 বিভীষণে ক্ষুণ্ণমনে কহে রঘুবীর ।
 কহ মৈত্র কোথা বাড়ী, কাহার নন্দন
 কি সম্পর্ক তার হয় লক্ষা-অধিশ্বর,
 কেমন প্রকৃতি তার, বীরত্বে কেমন ?
 বিবরিয়া পরিচয় কহ মৈত্রবর ।
 উত্তরিল বিভীষণ শুন রঘুপতি
 বিষ্ণুভক্ত, মহাবীর, রাবণ-পালিত
 রঞ্জেন্দ্রের ভ্রাতুষ্পুত্র নিকট্য সে জ্ঞাতি
 যার রণে সুরাসুর সতত ত্রাসিত ।
 নানা শাস্ত্রে পারদর্শী, বিজ্ঞ, বিচক্ষণ
 রঞ্জেন্দ্রের প্রাণ-সম রক্ষ-ইন্দু মানে
 রাজভক্ত, শাস্ত্র চিত্ত, সূচারু দর্শন—
 করিবে সমর সবে অতি সাবধানে ।
 তরণী-সদগুণ-বার্তা করিয়া শ্রবণ
 কহিলা শ্রীরাম তবে অনুজ লক্ষণে
 হেন বিষ্ণু-ভক্তে স'পে শমন-সদন,
 কি স্থখে এ শূন্য প্রাণ রাখিব' ডুবনে ?

ত্যজিব জীবন ভাল নীলাম্বুর জলে,
 সপিব সীতায় ঘোর পাতকীর করে,
 তবু ভক্ত-অঙ্গ দহি তীব্র শরানলে,
 বিজয়-বাসনা মম নাহিকো অন্তরে !
 হায় ! আমি বৃথা করি জ্বলধি-বন্ধন,
 তুচ্ছ নারী তরে আসি এ ঘোর সংগ্রামে
 কত যে অমূল্য রত্ন দিনু বিসর্জন,
 কলঙ্ক অপিণু রঘু-অকলঙ্ক-নামে ।
 এত বলি কেঁদে রাম ফেলি ধনুর্ব্যাণ
 উপবিষ্ট ত্যজি সর্ব সমর-ভূষণ,
 কহিলা শ্রীরামে তবে মন্ত্রী জাম্বুবান
 দয়ার আধার প্রভো ব্যাপ্ত ত্রিভুবন ।
 কিবুঝাব নিজে, জ্ঞানহীন পশুজাতি
 তুমি ব্রহ্ম সর্ব ঘটে বিরাজ চিন্ময়,
 কায়া-ভেদে হেরি মাত্র বিভিন্ন মূরতি,
 ভক্তাভক্ত-স্বর্গ্য তুমি, তোমাতেই লয় ॥
 ভক্তের নিয়তি যদি এ অন্ত-সময়
 তোমার কি অপরাধ, উপলক্ষ তুমি
 নিজে নিজ-মৃত্যু জীব টেনে অঙ্কে লয়,—
 নিয়ন্তা বা বিধানের তুমি অধিস্বামী ।
 এক দিন যে বিধান করেছ স্থাপন
 লজ্জিতে না পারি নিজে ধর নরকায়

নৈলে এ ব্রহ্মাণ্ড যেই করেছে সৃজন
 সে কি দীন বেশে নাথ বিপিনে বেড়ায় ?
 লভেছ জনম এবে ক্ষত্রিয়ের কুলে,
 ক্ষত্রিয়ের ধর্ম রক্ষা উচিত তোমার
 যুদ্ধ-নীতি বৃণ-ক্ষেত্রে ভা'সালে অকূলে,
 এ অকীর্তি চিরকাল ঘোষিবে সংসার ।
 তোমার আশ্রিত যত রাঘব বাহিনী
 রণাদেশ-প্রতীক্ষায় রয়েছে নীরবে
 না দিলে সমরাদেশ রক্ষ-অনিকিনী
 নির্বিবরোধে একে একে বিনাশিবে সবে !
 তোমার সমক্ষে তব স্নেহাশ্রিত জন
 থাকিতে বিপুল শক্তি হবে হত-প্রাণ
 আর তুমি ক্ষত্র হয়ে করিবে দর্শন—
 এই কি বৈদেহী নাথ নীতির বিধান ?
 অতএব বৃথা চিন্তা কর পরিহার
 স্বকরে করহ প্রভো কাশ্মুক ধারণ
 হের ঐ রক্ষ-সৈন্য করি মার-মার
 আসিছে কৃতান্ত-সম ভীষণ দর্শন
 জাম্বুবান-হিত-কর শুনিয়া বচন
 পুলক-পূরিত-মনে প্রশংসিলা সবে
 শ্রীরাম সমরাদেশ করিলা অর্পণ
 মাতিল রাঘব-সৈন্য সমর-উৎসবে ।



নবম সর্গ ।

সমর-চুন্দুভি বাজে স্বর্ণ-লঙ্কাপুরে
 কাপাঁইয়া নীর-নিধি সুনীল গগন
 মৃদঙ্গ, দামামা, কারা, শঙ্খ, সিঙ্গা-সুরে-
 কম্পিত প্রান্তর, গিরি, বন, উপবন !
 লক্ষ লক্ষ জয়-ঢাকা, কাংশ, করতাল,
 সানাই, সমর-ভেরী, জগবাম্প, ঢোল,
 স্বনোন্মত্ত-ত্রাস-গতি শ্বাপদের পাল
 আতঙ্কে মৃগেন্দ্র পায় মাতঙ্গের কোল ।
 ভিন্দিপাল, শেল, শূল, মুঘল, মৃদগর,
 পরশু, পট্টিশ, গঁদা, অসি, খরশান
 সজ্জিত রাক্ষসবৃন্দ,—সংহারের চর
 বিবিধ আয়ুধে যেন বীরত্ব-নিশান !
 অশ্বারোহী গজচর স্তন্দন-বিহারী
 নানাবর্ণ হয়, হস্তী সঙ্গে সঙ্গে চলে,
 সিংহনাদে সুরবৃন্দ কাঁপে থর-থরি,
 ভীত-প্রাণ জলচর প্রবেশে অতলে ।

পঙ্কপাল-দল যথা আবরে মেদিনী
 পশিল সমরে যত কর্বুর দুর্ব্বার
 কোদন্ত-টঙ্কারে বিশ্ব-লয়-অনুমানি
 গর্জিল ভীষণ রবে জলধি অপার !
 তারকা-বেষ্টিত যেন পূর্ণ শশধর
 স্তম্ভনে সম্মুখ-গামী সৈন্ত-মধ্যভাগে
 “রাম জয়” ভীমনাদে কাপাঁয়ে অশ্বর—
 তরণী স্মরিলে রামে প্রেম-অনুরাগে
 ভীষণ নিনাদে তার রঘু-সৈন্তগণ
 প্রকম্পিত মনে কত পড়ে রসাতলে
 শ্মশানের রাম-ধ্বনি শ্রবণে যেমন
 অন্তিম-আতঙ্কে নর কম্পিত ভূতলে ।
 কাস্ত-শশধর-কাস্তি চিত্ত-বিনোদন
 অন্তরে তরঙ্গ-লীলা প্রেম-পয়োধির
 গাস্তীর্ঘ্য নগেন্দ্র-সম নেত্র-প্রলোভন
 চারুচিত্র-শালা যেন নিসর্গ-রাজ্ঞীর ।
 হেরি রঞ্জে সীতা-কাস্ত বাৎসল্যে মগন
 কাঁদিল কোমল প্রাণ,—রোমাঞ্চ শরীর
 নীহার-আসার-সিক্ত কমল-নয়ন
 বিভীষণে ক্ষুব্ধ মনে কহে রঘুবীর ।
 চৌদিকে নেহারি মিত্র নানা অলক্ষণ
 নিমগ্ন মানস মম ঘোর নিরাশায়,

অবিরত বাম নেত্রে স্পন্দন-পীড়ন
 বিষাদের সিন্ধু যেন অন্তরে খেলায় ।
 সমীরণ স্বনে কর্ণে কি যেন হারাই,
 অমঙ্গল-অটুহাসি বিকট আননে—
 ক'রে নৃত্য, কহে ভীমা ক্রি যেন কি নাই,
 বিহিত বিধান কর বাহিনী-রক্ষনে ।
 আশ্বাস-ভাষণে তোষি জানকী-রঞ্জনে
 কহিলেন বিভীষণ রঘু-রথিগণ
 রাঘবে বিষন্ন হেরি কেন ক্ষুব্ধ মনে ?
 দ্বিগুণ বিক্রমে রক্ষে কর আক্রমণ ।
 জ্বালাও সমর-বহ্নি দাবানল প্রায়,
 কাপাঁও বীরত্ব দাপে সিংহল গগন,
 উড়াও যশের ধ্বজা বীর-প্রতিভায়,
 দাড়াও সম্মুখ রণে কৃতান্ত যেমন ।
 প্রতিরথী সনে বীর পঞ্চাশ হাজার
 ক্রমে আক্রমণে কর রক্ষ-বল ক্ষয়
 আতঙ্কে কম্পিত-অঙ্গ কর বসুধার
 ত্রিভুবন গণে যেন আগত প্রলয় !
 বিভীষণ সে ভীষণ উদ্বেজক রাণী
 শ্রবণে রাঘব-সৈন্য করে সিংহনাদ
 রণমদে সমুন্মত্ত রাঘব-বাহিনী
 দশরথি ক্ষুব্ধ-মতি গণে পরমাদ ।

নীল-গিরি-সম-কান্তি বিচিত্র দর্শন
 ধাইল বীরেন্দ্র নীল সসৈন্তে সবলে
 বিটপি পর্বত করে সমর-প্রাঙ্গন
 সমাকীর্ণ হল যেন অনন্ত অচলে ।
 মুহুমুহু অরিরাম পাদপ পীড়ন
 বক্ষে বক্ষ মুণ্ডে মুণ্ড হানে পরস্পর
 ঘন ঘন আশ্ফালনে ধ্বনিত গগন
 অচিরে ঘস্মাক্ত নীল অশক্ত কাতর ।
 শৈল-অঙ্গে গৈরিকের যথা নিশ্বরণ
 নাসারন্ধ্রে রুধিরের বহে নির্বারিণী
 বীর-চূড়া-মণি নীল লোহিত বরণ
 তরণী-পবনে উড়ে মর্কট-বাহিনী
 বুধস্কন্ধ কিস্কিন্দার স্ত্রী-বনুপতি
 দীর্ঘ-গ্রীব উচ্চৈঃশ্রবা হয়-গ্রীব-সম
 ভীম গদা করে হেরি নীলের দুর্গতি
 আক্রমিল রক্ষ-সিংহে কৃতান্ত-উপম ।
 গন্তীরে জীমূত যথা গরজে অশ্বরে
 গর্জ্জলা কর্ব্বুর-হরি প্রকোপে ভীষণ
 গদার সম্পাতে ঘন স্বন ভয়ঙ্কর
 তড়িদাম-সম-দ্রুত অগ্নি উদগীরণ ।
 অবিশ্রান্ত ভীম দন্তে দন্ত-সংঘর্ষণ
 পদ-নিপীড়িত মহী কম্পিতা অধীর

কুস্ত-চক্রাকার-দ্রুত দেহ-আবর্তন—
 সমুখিত ধূলি রোধে প্রভব দৃষ্টির ।
 তুহিনাদ্রি-শির-স্থিত মত্ত পঞ্চানন
 প্রমত্ত বারণে যথা দলি হুহুকারে,
 কর্বর-কেশরী করি ঘোর নির্যাতন—
 স্ত্রীবেদ বক্ষোপরি সিংহনাদ ছাড়ে ।
 ভূপতিত নৃপতির দুর্গতি দর্শনে
 ক্রোধারুণ নেত্রে বীর অঞ্জনা-নন্দন
 জলদ-গস্তীর-নাদে কাঁপায়ে গগনে
 প্রচণ্ড বিক্রমে রক্ষে করে আক্রমণ ।
 নিরখি সহস্র মুখে কহে নিশাচর—
 মৃত্যু-তরে পিপীলিকা বিহরে অশ্বরে
 শঙ্খিনী-বিবরে পশে ভ্রান্ত কাকোদর
 আয়ু-হীন-মৃগ স্পর্শে কেশরী-কেশরে !
 উড়ুপে সাগর-ত্যাগ হয় কি সম্ভব ?
 পঙ্কুর বাসনা কেন গিরি উল্লঙ্ঘনে ?
 সাজে কি কোকিল-নীড়ে কাকের উৎসব
 কেন যাবি মতি-ভ্রান্ত কৃতান্ত-সদনে ?
 বিক্রপ-ব্যঞ্জক-ভাবে হাসিয়া মারুতি—
 কহিল। রাক্ষস-জাতি বচনে পণ্ডিত
 আড়ম্বর-পূর্ণ বাণী রাক্ষস-প্রকৃতি
 বক্তৃতার উচ্চ ভাষা, কার্যো বিপরীত !

রাম-রণ-তরঙ্গিনী-অসিত-সলিলে
 নিয়তি আবর্ত-চক্রে ডোবে নিশাচর
 কোন লাজে বল সিংহ-আবাসে অচলে
 মাতঙ্গের মদগর্ব্ব স্পর্দ্ধাঘ্নিত স্বর ?
 কহে রক্ষ জ্বলি অপমান-হতাশনে—
 রাম-সঙ্গে বর্ব্বরতা না খণ্ডে বর্ব্বরে
 মলয়ে চন্দন-সার ধরে দ্রুম গণে
 বংশ যথা বংশ-দোষ কভু নাহি ছাড়ে !
 এত বলি মহাবলী রক্ষ-ধনুর্ধর
 লক্ষ্যত্যাগে শত্রু-ব্যূহ-অন্তরে পশিল
 হর্যাক্ষ আক্রমে যথা প্রমত্ত কুঞ্জর
 আঞ্জনেয় রণ-রঙ্গে সরোষে মাতিল ।
 মহীৰুহ বিঘূর্ণনে ভীম প্রভঞ্জন
 বহিল প্রবল বেগে উড়িল বাহিনী
 ধ্বনিল গগনে ধ্বনি স্বন্, স্বন্, স্বন্
 প্রপাতে বহিল বেগে-রক্ত-তরঙ্গিনী ।
 ঘূর্ণা-বাতে চূর্ণ-কায় যেমতি ভবন
 পড়িল মৰ্কট-সিং-হ রাক্ষস-বিক্রমে
 প্রমত্ত বারণ যথা দলে তৃণ-বন
 দলিত বানর-বৃন্দ, অনন্ত-বিরামে
 সমুজ্জ্বল অগ্নি-অঙ্কে যে দ্রব্য অর্পিত
 বিপরীত কৃষ্ণ-কায় সুষমা বিহীন

রক্ষ-রণ-অগ্নি-বক্ষে হয়ে নিপতিত
 অঙ্গদ, সূসেন, নল নিস্প্রভ মলিন ।
 স্বতেজে তিমির-পাশ ছেদিয়ে যেমন
 প্রভাতে উদিত দেব দীপ্ত দিবাকর
 দলিয়া বিপক্ষ-পক্ষ অরি-নিসূদন
 তরণী সম্মুখগামী করবুর-ভাস্কর ।
 কৃতান্ত-উপম রিপু হেরি বিচ্যমান
 লক্ষ্মণ হানিলা গদা রক্ষ-বক্ষোপরে
 তরণী “শ্রীরাম-জয়ে” কাপাঁয়ে বিমান
 কহে দ্রুত ক্রোধান্বিত কম্পিত-অধরে
 ধন্য ক্ষত্র-কুল-গ্ৰানি উর্শ্বিলা-রঞ্জন
 আমি নহি সূৰ্পনখা নিরশ্রয়া নারী
 বীরত্ব দেখাবি ক’রে অবলা-পীড়ন
 ইক্ষাকু-কুলের ধ্বজা আহা বলিহারি !
 এরক্ষ-সমরে যম যম-সম গণে
 ইন্দ্র ধায় মহাক্রাসে বৈজয়ন্তী হ’তে
 কি সাহসে এলি রক্ষ-সমর-প্রাঙ্গণ
 তারা-প্রায় উর্শ্বিলারে দেবরে অর্পিতে ?
 উত্তরিল বীর-দাপে সৌমিত্রী-সুমতি
 যুবতী যে কুলাঙ্গনা বিজন কান্তারে—
 মোহিতা কুসুম-শরে হেরি পর-পতি
 “নাক কাঁটা” যোগ্য খ্যাতি তাহার সংসারে ।

ভ্রাতৃকরে নিজ রাজ্য শত্রু-করে জায়া
 গুরুতর কর্তব্যতা উদ্ধার-সাধন
 কিস্কিন্দ্যার চিত্রে দেখে রাজ-নীতি ছায়া
 লঘুতর পাপ বলি, বালী-নিসূদন ।
 উৎকলে দেবর পতি শাস্ত্রের বিধান
 মর্কট-কুলের উহা আছে চিররীতি
 পরম পণ্ডিত রাম করুণা-নিদান
 রাক্ষসে বুঝিবে কিসে রাম-রাজ-নীতি ?
 মানীর মর্যাদা-বোধ মানীর সদন
 ইতরে কি জানে কভু মহিমা উহার,
 চন্দ্র-চূড় করে শিরে চন্দ্রমা-ভূষণ
 সে চন্দ্রে কবলে গ্রাসে রাত্বে দুর্গিবার ।
 জলদ গম্ভীর-নাদে কহে রক্ষ-বীর
 নীতি-শাস্ত্র ধর্ম-মর্ম উচ্চ আলোচনে
 তোর সঙ্গে নিরর্থক, কলঙ্কী অধীর
 কে বলে ধর্মের নীতি-তস্কর-সদনে ?
 ভুবন-বিদিত যার যশঃ—সমুজ্জ্বল
 অকলঙ্ক রক্ষ-বংশ সন্মুখ-সংগ্রামে
 ঔদ্ধত্যের উপযুক্ত দিব প্রতিফল
 বর্বরতা দোষ যেন দমে পরিণামে ।
 এত বলি মহাবলী করবুর প্রবল
 হানিলে সৌমিত্রী-বক্ষে মুঘল ভীষণ

ইন্দ্র-বজ্রে পড়ে যথা মৈনাক-অচল
 সশব্দে পড়িলা ভূমে স্মিত্রা-নন্দন ।
 অন্তরীক্ষে দেব-বৃন্দ করে পলায়ন,
 ভয়ে ভীত দিন-পতি জলদে লুকায়,
 হাহাকারে কাঁদিলেন রাম-বিভীষণ
 ভ্রাতা-অঙ্কে কম অঙ্গ ধরণী-লোটায় !
 হতজ্ঞান জানুমান আদি মহারথী
 ছিন্ন-মূল-ক্রম-সম পতিত ভূতলে
 গত-প্রাণ মত্ত হস্তী বিরথ সারথি
 সমরে প্রবল রক্ত-প্রবাহিণী চলে ।
 বিলুপ্ত খছোত যথা তপন কিরণে
 ক্রমে যত রঘু-রথী হল অদর্শন
 সতেজে সমরাচলে আরক্ত নয়নে
 উদিল রক্তিম-আভ কর্ব্বুর তপন ।
 ধ্বজ-বজ্রাকুশ চিহ্ন-অগ্নিত শ্যামল
 বিমল মাধুরী রাম-দেহ-লতিকায়
 অমিয় অন্তর-দ্যুতি বদনে উজ্জ্বল
 পূর্ণ-শশধর-কাস্তি চরণে বেড়ায় ।
 হেরি রক্ষ প্রেম-পূর্ণ-সজল নয়নে
 বন্দিলা বিরিকি-বন্দ্য নিত্য-নির্বিকার
 বিভীষণে পূজে মনে ভকতি-চন্দনে
 আতঙ্কে কম্পিত-অঙ্গ স্বর্গে দেবতার !

অন্তরীক্ষে আখণ্ডল চিস্তায়-বিহ্বল
 ভক্তিভরে যুক্ত-করে ভাবে মহামায়া ।
 তরণী-নিধন আশা হইল নিষ্ফল
 স্বপ্নে বিপদে মাতঃ দেহ পদ-ছায়া ।
 নিয়তি-রূপিণী কালী মহামায়া-রূপে
 পশিল তরণী-হৃদে হেরি অন্তকাল
 ডুবিল বিবেক-জ্ঞান মত্ততার কূপে
 ধরিল ভীষণ মূর্তি কালান্তের কাল ।
 রুদ্ধ-বলে ভীম শূল করি উত্তোলন
 ত্রিশূলীর প্রায় ধায় মহাক্রোধে জ্ব'লে
 অস্তিমে ভীষণ-কায় কৃতান্ত যেমন
 কাঁপিল সভয়ে বিশ্ব, বাসুকি পাতালে
 রক্ষ-রথ হ'তে বিষ্ণু হল অন্তর্দ্ব্যান
 গর্জিল অররু-বৃন্দ ভীষণ আক্রোশে
 মাতিল রাঘব-রথী কাঁপা'য়ে বিমান
 লাগিল শ্রবণে তালি কোদণ্ড-নির্ঘোষে
 মৃগেন্দ্র আক্রমে যথা প্রমত্ত কুঞ্জরে
 কোপান্ন রাক্ষস গর্জে মহাভয়ঙ্কর
 ভীষণ ত্রিশূলাঘাতে রাঘব কাতরে
 পড়ে যথা বজ্রাহত মন্দার-শিখর ।
 বহিল কোমল-অঙ্গে রক্ত-নির্বরিণী
 বহু ক্ষণে সচেতন জানকী-রঞ্জন

কোদন্ত-টঙ্কারে কাঁপে রাক্ষস-বাহিনী
 রণে মত্ত যমোপম বালী-নিসূদন।
 দশ-দিশি অঙ্ককার জলদ-গর্জ্জন
 সঘন অশনি-নাদে কম্পিত মেদিনী
 তাড়িত হরিতে ধাঁধে,—অশক্ত দর্শন
 ভীম প্রভঞ্জন-স্বনে আকুল সেনানী।
 প্রাবৃটের বারিধারা বর্ষণে যেমন
 মুহু মুহু অগণিত সায়ক-পতনে
 শোণিতাক্ত ত্যক্ত-প্রাণ রাম-রথিগণ
 লক্ষ লক্ষ চলে দ্রুত শমন ভবনে।
 চৌদিকে রাঘব-সৈন্য শোণিত-ধারায়
 বহিছে তরঙ্গময়ী রক্ত-তরঙ্গিনী
 সস্তিরছে হস্তী, অশ্ব,—তরঙ্গের ঘায়
 ক্ষণে ভাসে ক্ষণে ডুবে রাঘব-বাহিনী।
 শকুনি, গৃধ্রীকুল পুলকে পৃণিত
 পাখ-শাটে ভাঙাইছে সম-লোভী জীব
 শিবির বিকট নাদে গগন ধ্বনিত
 দশনে টানিছে রথী সজীব নিজ্জীব।
 অচিরে সমর-ক্ষেত্র প্রেত-ক্ষেত্রপ্রায়
 সমাগত ভূতগণ হাহা-হিহি-রবে
 রঙ্গে ভঙ্গে নৃত্যশীল কবন্ধ বেড়ায়
 প্রেতের প্রভব ঘোর বিভৎস-উৎসবে।

আগত প্রলয় জানি কাঁপিল মেদিনী
 গর্জিল অনন্ত সিঙ্কু মহা ভীমাকার
 চিন্তিত ত্রিদশ-নাথ স্মরিল শিবানী
 এ বিপদে মহামায়া কর সমুদ্বার ।
 কহে মায়া শচীকান্ত রহ সুস্থমন
 অতি দ্রুত তরণীর এল অন্তকাল
 বিষ্ণু হতে ভক্ত বড় অজেয় ভুবনে
 প্রদর্শিতে দামোদর ক্ষেপে মায়াজাল !
 নবীন শ্যামল কান্তি রাম-জলধর
 তরণী-সায়ক-নব-তপন-কিরণে
 ধরিল অরুণ-আভা বিচিত্র সুন্দর
 শৈলেন্দ্র রক্তিম যথা গৈরিক-ক্ষরণে ।
 সঘনে কম্পিত অঙ্গ কহে বিভীষণে—
 অতি অলক্ষণ মিত্র এ রক্ষ-সমরে
 বিহিত বিধান কর রক্ষ-নিবারণে
 রথীহীন নহে হব এ অরাতি-করে ।
 প্রবল কর্তব্য-রূপি-ভীম-প্রভঞ্জন
 স্নেহের নীরদে যেন বেগে উড়াইল,—
 রক্ষ-হৃদাকাশে জ্বলি দামিনী যেমন
 তাড়িতে-ত্বরিত-জ্ঞান-নয়ন ধাঁধিল !
 কম্পিত অধরে রামে কহে রক্ষ-বীর
 ব্রহ্মবরে রক্ষ-সিংহ মহাবলবান

ত্রিভুবন এর রণে কম্পিত অস্থির
 “ব্রহ্ম-বাণে তবকরে তরণী-নির্ব্বাণ”
 “ব্রহ্মবাণ” উচ্চারণে রক্ষের অন্তর
 পদ্ম-পত্র-নীর প্রায় সঘনে কাঁপিল
 অচল-হৃদয়ে দ্রুত স্নেহ-দ্বীরধর—
 বর্ষণে নয়ন-কোণে অশ্রু সঞ্চারিল,—
 কাঁদিল পরাণ স্মরি নন্দন-বদন
 ইন্দুমতী স্মৃতজায়া স্মৃতি-দরপণে
 নিরখি, অলক্ষ্যে বীর আবরে আনন
 দমিলা হৃদয়াবেগ অশেষ যতনে ।
 মিত্রে সচঞ্চল হেরি ত্রাসে রঘুপতি—
 কহিলা তুমিহে বন্ধু এবিপত্তিকালে
 তোমার দয়ায় যদি পাই অব্যাহতি
 নতুবা ডুবিবে রাম রণ-সিন্ধুজলে ।
 এতবলি মহাশূর কোদণ্ড-টঙ্কারি
 ব্রহ্মবাণ চাপে খবে চাপিল স্মৃতি
 গর্জিল ভীষণ অস্ত্র অনল উগরি
 বাণ-অগ্রে সূক্ষ্মরূপে রাজে মৃত্যু-পতি
 স্বীয় মৃত্যু-বাণ হেরি তরণীর মন
 কাঁপিল সতয়ে বীর ছাড়িলা নিশ্বাস
 স্মরিলা অস্তিম জানি সরমা-চরণ
 ইন্দুমতী-মুখ-ইন্দু ভাবিয়া হতাশ ।

কহিলা তরণী খেদে ক্ষত্র চূড়ামণি
 হেন বীর্য্য বল নিয়ে রক্ষ-সনে রণ
 একশূলাঘাতে ভীৰু পড়িলা ধরণী
 লক্ষ শূল বক্ষে মম তৃণের পীড়ন,
 চির-অনাতঙ্কহৃদি-নগেন্দ্র-বিবরে
 এত দিনে শঙ্কা-ফণী কোশলে পশিল
 প্রমত্ত বারণ-দন্ত বিধি-চক্রে প'ড়ে
 মুনালিণী-আকর্ষণে অকালে ভাঙ্গিল ।
 সপ্ত জন্ম তপস্যায় মিত্র বিভীষণ
 বিপদ-বারিধি-ভেলা বিধি মিলাইল
 মৃত্যু-সন্ধি-দীক্ষা-মন্ত্রে করে পরিত্রাণ,
 শিবর বীরত্ব-ধ্বজা সিংহলে উড়িল ।
 অক্ষের নয়ন-মণি-সিন্ধু-নিসূদন
 অজাতুজ পিতা করে অজত্ব-বিকাশ
 বালী-গুপ্ত-হত্যাকারী সুপুত্র তেমন
 অজ-কুল-কৃতিত্বের করিলে প্রকাশ ।
 দ্বিতীয় ডঙ্কার ধ্বনি লঙ্কার সমরে,—
 সমুখিত ভীমরবে তরণী-নিধনে,—
 যার যশঃ-রবি দীপ্ত অখিল সংসারে—
 সেকিরে ডড়ায় ভীৰু অনন্ত-শয়নে ?
 নিমিষে সে বাণ-বহ্নি কালানল সম
 ছাইল বিমান পথে ;—ঘোর ধূমাবৃত্ত—

বজ্র-সম তরণীর ভেদিল মরম
 সর্ব্বাঙ্গে বহিল ঘোর শোণিতের স্রোত ।
 তত্ত্ব-জ্ঞান জনমিল স্মৃতি-ফলে
 হেরিলা অস্ত্রিমে রামে বিষ্ণু-অবতার
 তরণী শমন-জয়ি-রাম-নাম ব'লে
 ছাড়িল অরু-দেহ পার্থিব আকার !
 ভীষণ সে শোক-বহি হ'য়ে প্রজ্জ্বলিত—
 গ্রাসিতে আগত যেন রক্ষ-বিভীষণে,—
 চৌদিকে নেহারে ধূম-তমসা-আবৃত
 নিরাশা-ভ্রুকুটি রাজে করাল বদনে ।
 হিমাধার সম যেই ধৈর্য-আলয়
 শোক-ভুকম্পনে আহা সঘনে কাঁপিল
 শূন্য প্রাণে, শূন্য জ্ঞানে, আকুল হৃদয়
 “হা পুত্র” বলিয়া রক্ষ ভূতলে পড়িল ।
 “হায় কি করিলে মিত্র মৃত্যু-সন্ধি বলি ?
 প্রাণের তরণী অম হৃদয়ের ধন
 মিত্র-পুত্র, ভক্ত-বধি কলঙ্কের কালী
 নির্ম্মল ইক্ষুকুলে করিহু অর্পণ ?
 এর চেয়ে শত গুণে তরণীর করে
 ছিল শ্রেয় রণ-ক্ষেত্রে অনন্ত-শয়ন
 কি ফল এ অনুতপ্ত ছাড় দেহ ধ'রে
 জয়াশা-মোহিনী-মোহে অকৃতি ভাজন”

এতবলি রামচন্দ্র ফেলি ধনুর্বাণ
 ভীষণ শোকের অঙ্কে পড়িলা ভূতলে,
 বিগলিত অশ্রু-ধারা আকুলিত প্রাণ ।—
 ভাসিল উন্মীলা-কান্ত বিষাদের জলে ।
 পড়িল রাক্ষসদলে ঘোর হাহাকার ।—
 শোক-সিঙ্ধু-নীরে- মগ্ন বাঘব-বাহিনী
 গরজে সম্মানে ঘন শোক-পারাবার
 কাঁদিলা আকুল-প্রাণে লক্ষা-বিষাদিনী !
 নাদিল দুন্দুভিধ্বনি বৈজয়ন্তীপুরে
 নাচিল দিগ্ধ-বৃন্দ আমোদে অধীর
 মাতিল উৎসব মদে অমর নিকরে
 হেরি চির-রাহু-গ্রন্থ কর্বুর-মিহির ।
 রক্ষ-রাজ শির-স্থিত কিরীট সুন্দর
 সহসা পড়িল খসি স্মরিলা শঙ্করে,
 সরমার হাহাকার-পূর্ণ সৌধ'পর
 অমঙ্গল সংঘোষিছে শঙ্কুনি নিকরে !
 কনক-প্রতিমা যেন প্রসাদ-শিখরে
 রণ-ক্ষেত্র-গত-নেত্র অচঞ্চল স্থির
 তড়িদ্যুতি ইন্দুমতী আকুল অন্তরে—
 গ'ণেছে তরঙ্গ যেন রণ-জলধির
 বিন্দু-বিন্দু অশ্রুবিন্দু শোভিল বদনে
 নিশার কমলোপরি হিম-কণা-সম,

ক্রান্ত সুধা-কর-কান্তি কল্লনা-নয়নে—
 হেরি ভ্রান্ত, নিয়তির প্রকৃতি নিশ্চয়ম ।
 অকস্মাৎ সমুথিত অমঙ্গল ধ্বনি,
 সঙ্গে সঙ্গে যুথ-ভ্রষ্ট মাতঙ্গ যেমন—
 হাহাকারে ধায় যত রাক্ষস-বাহিনী
 লঙ্কাপুরী শোকাস্বরী করিলে ধারণ,—
 সেধ্বনি অশনি-সম পশিয়া শ্রবণে—
 তারিত-প্রবাহ প্রায় রোধিল ধমনী
 ইন্দুমতী গ্লান-দ্যুতী কম্পিত চরণে
 দাঁড়াইলা বাণ-বিদ্ধা-সুপ্তা কুরঙ্গিনী ;—
 আলু-থালু মুক্ত-কেশ যেন উন্মাদিনী
 বিষাদিনী হেরে ঘোর রক্তিম নয়নে—
 ভীষণ তমসাময়ী শোকের বামিনী—
 গ্রাসিছে যেন রে বিশ্ব করাল বদনে !
 অসীম অনন্ত সেই ঘোর অন্ধকার
 চৌদিকে ধ্বনিছে বায়ু,—নাই, নাই, নাই
 অমনি চমকি সর্তী করিয়া টাঁকার
 কহে দিয়ে করতালি নাচি ধাই-ধাই ।
 ঐ আছে !—জ্যোতির্শ্ময় দিবা বেশধারী
 দেবেন্দ্র দোলায় গলে মন্দারের হার
 উলু দেয় দিগঙ্গনা দাড়াইয়া সারি
 কি অপূর্ব ছবি আহা ! হৃদি-দেবতার ।

দিব্য শঙ্খনাদে তৃপ্ত যতেক অমর
 ঐ যে স্তম্ভনে হাসি-লহরী খেলায়
 প্রফুল্ল বদনে দীপ্ত পূর্ণ সুধাকর
 ঐ যে নয়ন-কোণে কহিছে আমায়
 “এস এস প্রেমময়ি, হৃদয়ের রাগি
 জীবন-সঙ্গিনী মম প্রফুল্ল বদনে
 ত্যজিতে কি পারি তোমা দিবস-যামিনী
 চির-অন্ধ-লক্ষ্মী তুমি জীবন-মরণে ।
 কি মধুর ! কি মধুর ! সন্মোহিনী বাণী !
 কেড়ে নিল অলঙ্কিতে মনোবুদ্ধি-প্রাণ
 রূপ রস, শব্দ, স্পর্শ, গন্ধ-সঞ্চারিণী
 সঞ্জিবনী-শক্তি যেন হয় তিরোধান ।
 ঐ যে ছুটিল রথ বিদ্যাৎ গমনে
 ক্রমে উজ্জপানে, খর্ব্ব, ক্রমে খর্ব্বকায়
 মিশিল, মিশিল বুঝি, অনন্ত-গগনে
 চিরতরে চারু ছবি দিব্য নীলিমায়,—
 দাঁড়াও দাঁড়াও নাথ নবীন নীরদ,—
 এই যে উড়িল তব দাসী চাতকিনী
 বলিমাত্র বৃন্ত-চ্যুত ইন্দু-কোকনদ
 বিশুদ্ধ গড়ায় ভূমে সুবর্ণ-নলিনী ।

